

# ANG DAPIT NGA GITAGANA

## SA DIOS SA PAGSIMBA



Iduko nato ang atong mga ulo sa makadiyut.

Minahal nga Langitnong Amahan, ginaisip namo kini nga usa ka pribilihiyo nga maania karong adlaw sa niining siyudad sa Los Angeles, ug sa taliwala niining, mga magtotoo nga . . . mga Pinili nga tinawag na pagawas sa kalibutan, linahi nga mga anak sa Dios, sa niining mahimayaon nga panahon nga among ginapuy-an, ilalum niining dakung pagpaabot sa pagpakita sa among Hinigugma, si Ginoong Jesus, sa unsa mang orasa. Ginapasalamatan Ka namo tungod niini dinhi sa among kasingkasing, ingon nga nagatoo kami nga moabot Siya sa among henerasyon. Nagapaabot kami Kaniya. Kung dili man Siya moabot karong adlaw, ug ania pa kami dinhi ugma, nan magpaabot kami Kaniya ugma.

<sup>2</sup> Minahal nga Dios, ginaampo namo nga kini nga panagtigum mamahimo gayud nga usa—usa ka espesyal nga panagtigum. Hinaut nga kini nga higayon mamahimong usa—usa ka makasaysayan alang sa kalamboan sa Iglesia, nga maisulat sa Imong mga Basahon diha sa Eternidad. Panalangini ang matag mahuyang nga pagpaningkamot nga among ginahimo, Amahan. Naamgo namo nga kami'y bug-os gayud nga mapakyas kon wala Ka, busa gikinahanglan gyud Ikaw namo, Ginoo, kung buut namo nga makapadayon. Ug wala namo ginatinguha kini para sa kaugalingon namong kahimayaan. Ginatinguha namo kini alang sa Imong kahimayaan. Tungod mao man kana ang tinguha sa among kasingkasing, ang makita nga mahimaya si Jesus diha sa Iyang katawhan. Aron nga malig-on ang ilang pagtoo, Ginoo, sa niini nga panahon sa diha nga malisud na kaayo ang pakiggubat, mianhi kami alang niini nga rebaybal sa among taliwala, ingon nga usa ka dalangpanan, og usa ka pangpalagsik. Ginaampo namo nga itugot Mo kining mga butanga nganhi kanamo, kay amo kining ginapangamuyo sa Ngalan ni Jesus. Amen.

Makapanglingkod na kamo.

<sup>3</sup> Igsoong Shakarian, Igsoong babayeng Wyatt, ug sa mga higala sa atong Ginoong Jesus Cristo, mapasalamaton gayud ako tungod niini nga kahigayonan nga maania sa Los Angeles pag-usab, aron magwali mahitungod niining mahiyamaong Jesus kinsa mao'y gianhi natong tanan aron nga mas maila pa niining adlaw. Kung ang atong mga pagpaningkamot . . .

<sup>4</sup> [Adunay usa nga nagapakig-istorya kang Igsoong Branham mahitungod sa mikropono—Ed.] Oo, sir. [Blangko nga bahin

sa teyp.] . . .kini nga matang. Medyo usa kini ka komplikado nga butang. Aba, kini nga butang mora'g dili man ganahan makigtimbayayong. [Nagasulti ang uban kung unsaon sa pagpaangay ang mikropono.] Bueno, basin dili na kini moandar nga ingon niana. [Blangko nga bahin sa teyp.] . . . Igsoong Shakarian. Karon mas arang-arang na kanang paminawon.

<sup>5</sup> Medyo gamay ra, gamay ra akong tingog, apan aduna ako'y usa ka daku nga Mensahe gikan sa Ginoo. Daghan ma'y pagbabag gikan kang Satanas, aron babagan nga maihatud Kini, apan mahatud gyud nato kini dinhi bisan pa man. Nagasalig kita nga mamahimo kining usa ka halangdon nga semana para kanatong tanan.

<sup>6</sup> Nagalingkod ako dinha nga naghunahuna kung pila na kaha ka mga higayon nga ang atong minahal nga Igsoong Thomas Wyatt nga mitaliwan na, sa walay pagduhaduha, namulong dinhi niining mao ra nga pulpito, usa ka halangdon nga alagad ni Cristo.

<sup>7</sup> Nakaila gyud ko kang Igsoong Wyatt. Dugay na siya nga usa ka dakung inspirasyon para kanako sa diha nga mopakighimamat ako ug makig-istorya kaniya. Mahinumduman ko pa, kaniadtong usa pa lang ako ka batan-ong magwawali, kanunay niyang. . . ang iyang libro, nag-ulohan og, *Wings Of Healing*. Gusto ko kana nga ulohan, *Wings Of Healing*.

<sup>8</sup> Ug malipayon kita nga maania dinhi niining templo nga dugay nang gihalad para sa buluhaton ni Cristo. Panalanginan ang iyang balo, ug kamong tanan nga. . . Oo, kabalo ko nga gimingaw na mo kaniya, usab. Gimingaw pud ko sa iyang tulumanon, sa dihang akong nabalitaan nga mitaliwan na diay siya. Ganahan gyud kong maminaw niadto nga tingog. Medyo edaran na siya, apan aduna gihapon siya'y maanindot og makusog nga tingog, ug—ug aduna siya'y mensahe gikan sa Dios. Ug nagapabilin sa gihapon ang iyang kinabuhi dinha kaninyo nga mga tawo. Ug dinha sa natad sa pagpangmisyon kon diin niya gipadala kadto nga mga mensahe, ug uban pa, ang Ebanghelyo nagapadayon gihapon tungod ni Thomas Wyatt. Hinaut nga ang iyang kalag mopahulay na sa kalinaw hangtud sa panahon nga mahinagbo na nato siya diha nianang mahimayaon nga Yuta kon diin wala na'y kamatayon o pagkatigulang. Ania kita dinhi aron sa pagpadayon hangtud nga ang atong turno pagatawgon na o hangtud sa dakung pangkinatibuk-an nga pagkabanhaw sa diha nga moabot na si Jesus aron kuhaon kitang tanan.

<sup>9</sup> Bueno nasayod ko nga aduna kamo'y panerbisyo dinhi, siguro, unyang gabii. Ug giingnan ako, kaganina, nga—nga aduna kono kamo'y panerbisyo dinhi unyang gabii, busa magdali ra ko sa ingon ka dali nga mahimo ko.

<sup>10</sup> Tungod kay, akoa man pud ang Lunes sa gabii, Martes sa gabii, Miyerkules sa gabii, og uban pa, niining semanaha, busa nagasalig ko nga panalanginan kita sa Ginoo. Iampo nato ang mga may sakit. Iwali nato si Cristo, kung buut Niya, kung kabubut-on man Niya, sa tanang kagahum diha sa Iyang pagkabanhaw nga Iyang igatugot nga atong buhaton. Ug kung unsa ma'y ihatag Niya kanato nga pagabuhaton, mao kana ang gusto natong buhaton sa tibuok natong kasingkasing. Ug ako—nasayod ko nga panalanginan Niya kita kung toohan lang nato Siya.

<sup>11</sup> Ug karon sa dili pa nato ablihan ang Pulong, aron magbasa Niini, gusto kong makigsulti 'sa Kaniya pag-usab, samtang ginaduko nato ang atong mga ulo ug magmahilomon karon, ug nagasalig nga wala na'y mga pagkalibog. Nasayod kita, nasayod ang tanang mga Cristohanon, nga ang kaaway, ang atong kaaway, nagapamuhat gyud sa bisan asa. Apan, kita n'yo, pagmahitabo gani ang ingon nianang mga butang, magmahilomon lamang. Nahibalo man ang Dios kung unsa kanang tanan. Kita n'yo, pagpabilin lang nga nakalingkod, tingali'g nagabuhat na siya og usa ka butang nga wala kamo'y unsa man nga hingsayran karon mismo. Makigsulti ta Kaniya.

<sup>12</sup> Amahan, ginaampo namo karon nga Imong papalinawon ang dagat, ingon nga ang gamhanang si Ginoong Jesus nagaduol na pinaagi sa Iyang Pulong karon, nga ginapresentar nganhi kanamo, diha sa usa ka bag-ong hugna, ug ang Iyang gahum ug mga pagpadayag. Ginapangamuyo namo kini, samtang magabasa kami sa Iyang Pulong, hinaut nga mahimo Kining buhi sa among mga kasingkasing karong adlaw, aron nga maila namo Siya, diha sa gahum sa Iyang pagkabanhaw. Kay amo kining ginapangamuyo sa Ngalan ni Jesus. Amen.

<sup>13</sup> Karon kung mahimo ablihi ninyo ang Basahon sa Deuteronomio. Gusto kong mobasa og usa, o duha ka bersekulo, gikan sa Basahon sa Deuteronomio, sa ika-16 nga kapitulo sa Deuteronomio.

*Saulogon mo ang bulan sa Abib, nga nagakahulogan og Abril, ug bantayi ang pasko alang sa GINOO nga imong Dios: kay sa bulan sa Abib gikuha ikaw sa GINOO nga imong Dios . . . gikan sa Egipto sa gabii.*

*Ug maghalad ka sa pasko alang sa GINOO nga imong Dios, gikan sa mga karnero ug gikan sa mga vaca, sa dapit kon diin ipahimutang sa GINOO . . . (pasayloa ko) . . . sa dapit nga pagapilion sa GINOO nga papuy-an sa iyang ngalan.*

*Dili ka magkaon uban niini og tinapay nga adunay levadura; sa pito ka adlaw magakaon ka og tinapay nga walay levadura, ug sa tinapay sa kaguol; kay sa madali migula ka gikan sa yuta sa Egipto: . . . aron nga*

*mahinumduman ka sa adlaw nga migula ka . . . gikan sa yuta sa Egipto sa tanan nga mga adlaw sa imong kinabuhi.*

*Ug walay levadura nga hikit-an diha kanimo, sa tibuok nga utlanan, sa tibuok mo nga utlanan sa pito ka adlaw; ni adunay bisan unsa . . . sa unod, nga imong pagaihawon sa hapon sa nahaunang adlaw, nga igabilin sa tibuok gabii hangtud sa pagkabuntag.*

*Dili ka makahalad sa pasko sulod sa bisan unsa nga ganghaan . . . nga gihatag kanimo sa GINOO nga imong Dios:*

*Kondili sa dapit nga pagapilion sa GINOO nga imong Dios aron pagapuy-an sa iyang ngalan, magahalad ka sa pasko sa hapon, ug sa pagkatunod sa adlaw, sa panahon nga migula ka gikan sa Egipto.*

<sup>14</sup> [Usa ka bata ang nagahilak sa kongregasyon—Ed.] Mora'g aduna na usab kita'y problema. Siguro mahimo ko man magsulti nga mas kusog pa kay sa niana. Uh-huh.

<sup>15</sup> Usa kini ka talagsaon kaayo nga teksto ang gusto kong hisgotan sa makadiyut, niining hapon, ang mahitungod sa: *Ang Dapit Nga Gitagana Sa Dios Sa Pagsimba.*

<sup>16</sup> Bueno, talagsaon ra kini. Apan sama sa gikaingon ko na, sa makadaghang higayon kaniadto, nga ang Dios kasagaran nagapuyo sa talagsaon nga mga pamaagi, sa talagsaon nga mga dapit, nagabuhat og talagsaon nga mga butang, tungod kay talagsaon man Siya. Ang si kinsa man nga nagatoo Kaniya, nagalihok pud nga talagsaon. Daghan, kaayong mga butang nga mahimo natong isulti mahitungod sa Iyang pagka-talagsaon. Apan nasayod ko nga ang tanan, nga nakaila Kaniya, nasayod usab nga Siya'y talagsaon, nagabuhat og talagsaon nga mga butang, sa talagsaon nga panahon usahay. Busa nagasalig kita karong adlaw nga panalanginan sa Dios kini, kining pagbasa sa Pulong, ug kining teksto nga akong napili nga hisgotan diha kaninyo.

<sup>17</sup> Karon, ang gihunahuna ko nga naghinungdan sa atong problema dinhi, mao'y, giputol nila ang mga teyp rekorder dinha dapit, ug gipalong ang kuryente dinha mismo sa mikropono. Busa, kung dili man nila mahimong ayohon kana, hinoon, madungog gihapon ko ninyo bisan pa man. Tarungan ra sa Dios ang atong mga igdulogog aron makadungog kita.

<sup>18</sup> Ang hinungdan nga gusto kong maghisgot mahitungod niini nga teksto, ug usa ka maanindot nga higayon usab nga hisgotan kini, sa panagtigum sa Full Gospel Business Men, tungod kay ang tanang mga kaiglesiahan, o ang kadaghanan niini, girepresentar man niini nga grupo, ang tanang nagkalainlaing mga denominasyon.

19 Ug nakita ko, sa makadaghan nang higayon, nga ang mga tawo, pagmahinagbo ko sila sa dalan, diha sa mga highway, ug diha sa mga eroplano, mga tren, mga bus, og moingon ko kanila, “Usa ka ba ka Cristohanon?”

20 Ang usa kanila moingon, “Bueno, Methodist ako. Baptist ako. Presbyterian ako. Lutheran ako. Pentecostal,” o mora’g ingon niana.

21 Ang matag usa aduna gyu’y usa ka denominasyon nga gusto niyang irepresentar. Ug maayo man kana nga magrepresentar og denominasyon, apan, sa gihapon, ang dautang bahin man gud niana, nga ang matag usa nagahunahuna na nga kining usa ka grupo mao lang ang pundok nga—nga makaadto sa Langit, ug mao lang kana ang usa nga—nga girepresentar sa Dios, kana lang, ang pundok ni kinsa man. Nahunahuna ko nga kining hapon usa gyud ka maanindot nga higayon aron han-ayon kana. [Nagapalampak ang kongregasyon—Ed.] Ug tingali’g mao kana’y hinungdan nga walay hunong nga ginasamok ni Satanas kining mikropono. Kabalo na mo, ang unsa man nga ginahimo sa tawo mamahimong sayup, apan ang ginahimo sa Dios dili gayud mamahimong sayup. Busa ingon nga usa kini ka maanindot nga higayon aron buhaton kini, usa pud ka maanindot nga dapit aron buhaton kini, busa, tabangan unta kita sa Dios niini, pinaagi sa Iyang grasya, atong paningkamotan ang mahimo nato aron sa paghisgot niini.

22 Karon kini nga teksto, nagagikan sa Basahon sa Deuteronomio. Nasayod ko nga ang Deuteronomio...ingon nga aduna ko’y pipila ka mga Kasulatan ug mga ingon-ana nga naisulat dinhi.

23 Kaniadto mahinumduman ko kini nga dali ra kaayo, apan tungod kay milagpas na ko og baynte-singko, sa ikaduhang higayon, mao nga medyo malisud na para kanako nga mahinumduman kining tanan. Busa, mosulod ako sa lawak ug mag-ampo. Ug sa diha nga ihatag na Niya kanako ang mga Kasulatan, ginasulat ko kini, ug siguro usa ka sinulat bahin niini, sa karon ug unya, aron akong mahinumduman sa eksakto nga pagkahatag Niya niini kanako.

24 Ang *Deuteronomio* ingon nga usa ka Griyegong pulong nagkahulogan og “duha ka balaod,” ang pulong nga Deuteronomio. Ug aduna ma’y duha ka balaod ang Dios.

25 Ug ang usa niana mao ang balaod sa kamatayon, ang dili-pagtuman sa Iyang Pulong. Hingsayran nato nga, sa dihang gisupak ni Eva ang Iyang Pulong kaniadto, naghinungdan kadto og kamatayon. Mao kana ang usa sa Iyang mga balaod, “Sa adlaw nga kamo mokaon niini, kana nga adlaw kamo mamatay.”

26 Ug dayon aduna Siya’y usa pa ka balaod, nga mao ang balaod sa Kinabuhi, ang pagkamasinugtanon. Kung dili mo buhaton

ang *ingon niini* ug mga ingon niana, ug, ginatuman mo ang Iyang Pulong, nan mabuhi ka.

<sup>27</sup> Sa laktud nga pagkasulti duha ra kana ka butang, sa akong paghunahuna niini, kana mao, ang pagtuman ba sa Iyang Pulong o kaha pagsupak sa Iyang Pulong.

<sup>28</sup> Usa sa niini nga mga balaod gihatag na kaniadto didto sa Bukid sa Sinai. Ug ang usa pa...Mao kadto ang balaod sa kamatayon. Ang usa pa ka balaod gihatag didto sa Bukid sa Kalbaryo, kon diin gihatag usab ang balaod sa Kinabuhi, pinaagi ni Cristo Jesus.

Aduna Siya usab og duha ka pakigsaad.

<sup>29</sup> Aduna Siya'y pakigsaad kang Adan, ang unang tawo sa yuta kaniadto. Ug kana nga pakigsaad adunay mga kondisyon, "Kung buhaton mo ang *ingon niini-ug-ingon niana*, buhaton Ko ang *ingon niini-ug-ingon niana*." Kinahanglan adunay buhaton si Adan aron mapadayon nga buhi kini nga pakigsaad atubangan sa Dios. Kinahanglan niyang magkinabuhi sa mga pamaagi sa Dios, nga ginatuman ang tanang Pulong sa Dios, og walay gilapas ni usa ka Pulong.

<sup>30</sup> Apan pagkahuman naghimo Siya og usa pa ka pakigsaad, ug kana mao ang kang Abraham. Kini nga pakigsaad wala nakabasi sa mga kondisyon, kondili wala gayu'y kondisyon. Gihatag sa Dios ang maong pakigsaad ngadto kang Abraham, nga walay mga kondisyon, man lang. Walay-kondisyon! Dili nga, "Akong buhaton." "Gibuhat Ko na! Human Ko nang gibuhat kini."

<sup>31</sup> Ug sa niana nga balaod kinahanglan magkinabuhi ang mga Cristohanon. Dili sa kung unsay gibuhat nato, kondili kung unsay gibuhat na Niya para kanato. Human nang gihalad si Cristo. Dili nga, "Igahalad Siya." Humana Siyang gihalad! Usa kini ka tapos na nga buhat. Nabuhi Siya, namatay, nabanhaw, mikayab ngadto sa Langit, og mibalik diha sa porma sa Espiritu Santo. Busa, usa kini ka tapos na nga buhat, sa Dios. Si Cristo, nga walay nailhan ni usa ka sala, nahimong akong sala; aron nga mobarug ako sa Iyang lugar, mipuli Siya sa akong lugar. Atua ako Kaniya, didto sa Kalbaryo, kaniadtong namatay Siya. Didto kinahanglan kong mamatay uban Kaniya, aron mabuhi. Tungod kay ang balaod sa sala ug kamatayon anaa man sa lawas, mao nga kinahanglan mong mamatay, aron nga maipasig-uli ngadto Kaniya.

<sup>32</sup> Apan karon aduna kita niining tanan nga mga pulong nga mahimo natong gamiton, niining halangdon nga mga teksto, nga kitang tanan nasayod na sa kadaghanan niini, ug sa halangdong mga tipo sa Kasulatan. Apan, niining hapon, giatubang nato kini, nga, walay sapayan niining tanan, Siya nagaingon sa gihapon nga aduna lang og usa ka dapit nga Iya kamong tagboon, walay sapayan sa tanan natong nagkalainlaing mga teorya. Aduna kita'y Judaismo. Aduna kita'y Mohamedanismo.

Aduna pud kita'y...Aduna kita og tanan nang matang sa mga kredo ug denominasyon, mga iglesia, ug uban pa, apan bisan pa niana miingon ang Dios nga aduna lang gyu'y usa ka dapit nga Iya kamong tagboon. Sa tanan niana nga mga dapit, nagaingon ang matag usa nga, "Magapakigtambo Siya diha sa akong iglesia. Ug kung dili ka man miyembro sa akong iglesia, Siya—dili Siya makigtambo kanimo. Ikaw, kinahanglan mo 'una nga mahimong miyembro niini nga pundok o Siya—o dili gayud Siya makigtambo kanimo dinha. O, dili ka Niya pagatagboon sa bisan asa pa man kondili dinha ra gyud, diay."

<sup>33</sup> Ug dayon nahibaloan nato dinhi nga aduna diay Siya og usa ka dapit, usa lang gyud ka dapit. "Magahalad ka og halad diha sa dapit nga pagapilion sa Ginoo nga imong Dios." Karon aduna Siya'y usa ka gipili nga dapit kon diin ginatambo Niya ang nagasimba nga mga anak, ug dili sila magahalad sa bisan asa pa man kondili diha ra nianang usa ka dapit. Ang unsa mang uban pa nga dapit dili gyud magpulos. Aduna Siya'y usa ra ka pihong dapit nga pagatagboon Niya sila. Ug usa ka dapit, lamang, kon diin Niya ginatambo ang magsisimba.

<sup>34</sup> Dayon, kung tinuod man kana, kinahanglan siguradohon gyud nato nga makaplagan nato kana nga dapit. Nagatoo ko nga gikinahanglan gyud nato, ingon, nga mga tawo nga nahibalo nga kita'y himalasyon na, ug nagapuyo sa usa ka himalasyon na nga kaliwatan, nagapuyo sa usa ka himalasyon na nga kapanahonan, nagapuyo sa usa ka himalasyon na nga nasud, og anaa ilalum sa bandera sa kamatayon.

<sup>35</sup> Ug sa dili madugay matapos na kining kalibutana. Dili na kini magdugay pa. Halawum na kaayo ang sala. Wala na kini'y paglaum pa. Wala na gayu'y paglaum pa alang sa kalibutan. Lagpas na kini niana.

<sup>36</sup> Nagatoo ko nga nagapanghagdaw na ang Balaang Espiritu diha sa mga umahan, nagapangita *niining* usa ug *nianang* usa, tungod naghinapos na ang takna. Naiwali na ang Maayong Balita ngadto sa matag nasud. Ang mga ismo ug uban pa misunod Niini, apan bisan pa niana nagpadayon sa gihapon ang Maayong Balita.

<sup>37</sup> Ug karon, sa katapusang panahon, makita nato ang mga butang nga nagakahitabo sa kung unsa ang mga niini, aduna na'y dakung pasidaan taliwala sa pinili nga mga tawo sa Dios, aron hikaplagan ang husto. Ug angay gyud kita nga mahibalo niana. Karon, dili ang teorya sa kinsa man nga tawo, kondili ang mahibaloan kung unsa ang Kamatuoran, ang ginaingon sa Biblia nga mao ang Kamatuoran. Tungod kay, mamahimong ulahi na kini usa sa niini nga mga adlaw, para kanato, ug mahimong mao na kini ang adlaw, busa hunahunaon gayud nato kung unsay gisulti sa Dios.

<sup>38</sup> Hinumdumi, pagmosulti gani ang Dios og usa ka Pulong, dili na gayud Niya mahimong bakwion kana. Kinahanglan Niyang magpabilin nga mao ra sa gihapon. Dili Niya mahimong mosulti og usa ka butang, ug dayon moingon, “Bueno, Ako—dili man eksaktong ingon niana ang pasabot Ko.” Kita n’yo, Siya walay-kinutoban. Nasayod Siya sa pinakamaayo, sa sugod pa lang. Nagasulti kita og mga butang nga ginahunahuna natong mao’y pinakamaayo, dayon dili magdugay bakwion nato kana. Apan dili gyud kana mahimo sa Dios, ug magpabilin nga Dios ra sa gihapon. Busa kung Siya’y walay-kinutoban, Siya—dili Niya ginabuhat ang ingon-ana, tungod kay Siya’y hingpit man sa matag Pulong. Dili Siya nagasulti og usa ka Pulong gawas kon Eternal kana. Ang tanan Niyang pagka-Eternal anaa na uban Kaniya sa sinugdan pa lang, ang Iyang mga hunahuna, ang Iyang mga kinaiyahan, ug ginapahayag lamang niini ang kaugalingon niini ngadto sa kalibutan karong panahona.

<sup>39</sup> Karon, timan-i, aduna Siya’y usa ka gitagana nga dapit, usa lamang ka dapit kon diin Niya pagatagboon ang nagatoo nga mga anak. Ang bisan asa man nga dapit dili gyud magpulos.

<sup>40</sup> Hinumdumi, miingon si Jesus, kaniadtong ania pa Siya sa yuta, nagpakigsulti ngadto sa usa ka pundok sa mga tawo nga relihiyoso kaayo, buutan kaayo, edukado kaayo, og madasigon kaayo nga mga tawo, sa Dios, apan miingon si Jesus ngadto kanila, “Kawang ang inyong pagsimba Kanako,” gipaka-Doktrina sa ilang pagpanudlo ang mga tradisyon sa tawo. Hinumdumi ninyo kung unsa ka relihiyoso kadto nga mga tawo, ug kung unsa ka madasigon sa Dios. Nagatoo ko nga kung ihapon nato ang mga tawo nga mas madasigon, sa karon o kaha niadtong panahona, siguradong mas madasigon pa sila kay kanato. Mas madasigon gayud! Paghisgotan pud ang mga tradisyon ug mga balaod, ug mga ingon niana, matinuuron silang nagkinabuhi usab niadto. Ug sila’y mga madasigon kaayo sa Dios, ug mitoo gyud sila sa Dios. Apan si Jesus, ang Dios nga nahimong unod sa taliwala kanato, miingon, “Kawang ang inyong pagsimba Kanako.” Bueno, wala Siya miingon nga wala nila ginasimba Siya. Ginasimba man nila Siya, apan sa walay-kapuslanan.

<sup>41</sup> Busa ang unsa mang butang nga kawang lang wala-, wala gayu’y pulos, og walay mahatag nga kaayohan. Ayaw ninyo buhata ang ingon niana, tungod naga-usik-usik lang kamo sa inyong oras. Naga-usik-usik ra mo sa inyong ginhawa, nagasayang-sayang ra mo sa inyong mga kahago, hangtud mahibal-an na lang nato kung unsa gyud diay ang atong ginahimo.

<sup>42</sup> Sigurado, kung ginalauman sa Dios ang mga tawo nga mamahimong hingpit, sumala sa gikaingon ni Jesus, “Busa magmahingpit kamo ingon nga hingpit ang inyong Amahan nga atua sa Langit,” nan kinahanglan aduna gayud og pipila ka pagpangandam sa kon asa man. Ug miingon Siya, “Pagapilion



Ko ang dapit kon diin ang mga tawo magasimba Kanako. Walay ubang dapit nga Ako makigtambo kanila.” Ug, karon, siguradong anaa gyud kana nga dapit, ug kinahanglan natong pangitaon kana. Pangitaon kung diin man kana, ug dayon adtoan kana. Sa hunahuna ko nga kinahanglan gyud natong adtoan kana, sa gilayon, pag makaplagan na nato ang maong dapit, og isalikway ang ubang mga butang.

<sup>43</sup> Karon, timan-i, nga miingon si Jesus sa niining mao ra nga Kasulatan dinhi nga akong ginakutlo. Ang tradisyon sa tawo wala gyu’y kapuslanan. Dili kita magpatonto niana. Siguradong aduna gayud, sa kung asa man, og usa ka dapit nga Iyang gitagana para kanato, nga mahimo natong adtoan ug pagadawaton Niya ang atong pagsimba. Karon, timan-i, nga gawas nianang gipili nga dapit, bisan unsa ka pa ka matinuuron, unsa ka pa ka pundamental, nagasimba ka lang gihapon sa walay kapuslanan.

<sup>44</sup> Nasayod ko nga dili kana maayong paminawon. Apan, halos patapos na ang bilding, og dili nato gusto nga matay-og kini. Tornilyohan nato kini pinaagi sa Ebanghelyo, aron pag mahinagbo kamo sa mga tawo diha sa dalan, o kung asa man kamo, kamong mga Cristohanon, aduna kamo’y ikatubag kanila.

<sup>45</sup> Sa higayon nga moingon sila, “Oh, *mao* na Kana. Ug nakita ko na *kini* nga ginabuhat ang ingon niini, ug *kana* nga ginabuhat ang ingon niana.” Sigurado, ang tanan niining mga butanga kinahanglan mamahitabo. Apan adunay usa lamang ka dapit nga gitagana sa Dios, ug mao kana ang dapit diin ginatambo sa Dios ang magsisimba, lamang.

<sup>46</sup> Matikdi ang ika-2 nga bersekulo, “Magsimba sa dapit nga Akong gipili.” Gipili nga unsa? Sa niini nga pahayag nagapakita nga aduna Siya’y usa ka dapit kon diin magasimba ang tanang mga tawo. Walay pulos ang ubang mga dapit. “Ug sa niining mao ra nga dapit,” miingon Siya, “Gipili Ko usab nga ipahimutang ang Akong Ngalan sa niini nga dapit. Mopili Ako og usa ka dapit, ug ipahimutang Ko ang Akong Ngalan diha niini, sa niini nga dapit nga pagasimbahan sa tawo.”

<sup>47</sup> Karon, nagapakita kini nga adunay usa ra ka dapit, usa lamang. Kinahanglan nga pagpili kana sa Dios; dili nga atong pagpili. Wala kita’y pagpili; tungod humana Niyang gipili kana. Karon, unsa man ang gipili sa Dios mao’y husto. Mahimong sayup ang akong pagpili, mahimong sayup ang inyong pagpili, apan dili gayud masayup ang Dios. Hustong pagpili. Tatal, sa niini, Siya man mao ang ginasimba. Ug aduna Siya’y dapit kon diin Niya gustong tagboon ang Iyang mga magsisimba, ug kinahanglan dinha kita makigtambo Kaniya. Mao lang kana ang bugtong dapit kon diin Siya nagapabilin; ang bugtong dapit kon diin Niya kamo dunggon.

48 Matikdan nato dinhi, usab, “Ang dapit nga Akong gipili diin Ako pagasimbahon, ipahimutang Ko ang Akong Ngalan niana nga dapit.”

49 Oh, karon susihon nato ang mga Kasulatan para nianang dapit nga Iyang gipahimutangan sa Iyang Ngalan. Karon aduna man kita og mga landong ug mga tipo, sa tibuok Biblia, nasayod kita niana, mahitungod sa nagkalainlaing mga dapit kon diin Niya gitagbo ang mga tawo kaniadto, apan dili kana mao ang dapit kon diin Niya tagboon sila karong panahona. Tungod kay nagalandong lang kadto og usa ka butang, paingon sa matuod nga dapit kon diin Niya pagatagboon ang mga tawo, ngadto sa maong dapit, sa Iglesia kon diin Siya makigitagbo. Ug adunay usa ra ka dapit, adunay usa ka Iglesia, nga gisaad sa Dios nga tagboon ang mga tawo sa niini nga dapit ug tubagon ang ilang mga pag-ampo, kung moanha lang sila niana nga dapit ug mosimba Kaniya.

50 Karon hingsayran nato nga daghang mga pamahayag nga—nga aduna kono sila og dapit, nga ang Ngalan sa Dios anaa kono sa ilang dapit. Apan, nakita n’yo, *sila* man ang nagpahimutang sa Ngalan sa Dios dinha. Adunay dakung kalahian tali sa ang Dios ang nagpahimutang sa Iyang Ngalan dinha, ug tawo ang nagpahimutang dinha, sa Ngalan sa Dios. Kita n’yo? Angay natong hinumduman nga miingon ang Dios, nga ipahimutang Niya. “Gipahimutang Ko ang Akong Ngalan. Ipahimutang Ko ang Akong Ngalan sa niini nga dapit. Ug mao kana ang dapit nga Akong gipili, ug napili, nga angay’ng pagasimbahan sa mga tawo.”

51 Kini, ginapaklaro kanato karon ang mga landong kaniadtong panahon, ginapaklaro ’sab kanato si Cristo. Gihulagway na daan kaniadto sa tibuok nga Daang Tugon si Jesus. Sa Egipto, niadtong gabhiona sa diha nga kinahanglan adunay usa—usa ka cordero sa pasko ang pagapatyon alang sa proteksyon sa mga tawo, hingsayran nato nga ang Dios adunay usa ka dapit, usa ka kondisyon. Bisan unsa pa ka batan-on, unsa pa ka tigulang ang sacerdote, o ang ministro, og kung unsa ka man, kinahanglan mong maanaa sa niining pihong dapit. Ang tanan nga atua gawas nianang dapit, mangalaglag gayud. Kinahanglan mong maanaa niining usa ka dapit, usa ka dapit nga Iyang gitagana.

52 Karon, mahimo kitang mogahin og taas nga panahon, niining hapon, sa pagsaysay niana, nga mamahimo na lang nga pagsubli sa kung unsay nahibaloan na nato, kung giunsa kaniadto paghulagway daan kang Cristo diha sa mga tipo. Ang hinalad nga Cordero, nga kinahanglan pagatipigan kana, usa ka lakeng-carnero nga walay-ikasaway, ug kung unsa nga ang mga anciano ang kinahanglang mopatay niana, ug kinahanglan usab nga maisablig ang dugo niini ibabaw sa pultahan, tanan kadto nagalarawan sa pag-abot ni Cristo. Ug sa ilalum nianang giula

nga dugo mao ang dapit nga gitagbo sa Dios ang magsisimba, sa diha nga ang manulonda sa Kamatayon milabay sa yuta kaniadto.

<sup>53</sup> Nagatoo ko nga andam na kita nga mogawas gikan sa Egipto, usa sa niini nga mga adlaw, ug mopaingon niining Yutang saad. Ug panahon na kini nga modangat kita sa husto nga dapit, ug undangan na kining pagpakiglalis dinhi, “Presbyterian ako. Methodist ako. Baptist ako. Ako’y *ingon niini*. Ako’y *ingon niana* o *uban* pa.” Panggula kamo gikan niana, ug pangitaa kon hain kini nga dapit, tungod aduna gayu’y kamatayon bisan asa nga gawas sa Iyang gipili nga dapit. Mohampak ang kamatayon sa ingon ka sigurado gayud, kung wala kita diha sa Iyang gipili nga dapit. Apan diha sa Iyang dapit nga gipili, dili gyud makaabot ang kamatayon.

<sup>54</sup> Kung matikdan ninyo sa hinalad nga karnero, miduaw na man ang kamatayon didto. Miabot na ang kamatayon niadto nga dapit tungod kay gipatay na ang karnero. Miduaw na ang kamatayon. Ug busa kon asa miduaw ang kamatayon, dayon nagsaad ang Dios nga mao kadto ang Iyang dapit. Kung ingon-ana, nga dayag Siyang makita, hingsayran nato karon kung unsa kaniadto ang hinalad nga karnero, og kung unsa ang dapit sa kinabuhi niadtong panahona.

<sup>55</sup> Karon, para kanako, ginapanghimakak niini ang tanang mga argumento. Ingon nga dayag nga makita si Cristo, nga mao ang hinalad nga Cordero, kung ingon-ana ginapanghimakak niini ang tanang mga denominasyon, tanang mga kredo, tanang mga dogma, og tanang iglesia-nismo. Ginapanghimakak niini ang kinatibuk-ang butang. Husto kana, tungod hingsayran nato, dinhi, nga dayag Siyang makita, tungod Siya man mao ang putli og walay-sambog nga Pulong sa Dios. San Juan 1, miingon, “Sa sinugdan mao na ang Pulong, ang Pulong kauban sa Dios, ug ang Pulong mao ang Dios. Ug ang Pulong nahimong unod ug nagpuyo ipon kanato.” Busa Siya mao ang walay-sambog nga Pulong sa Dios nga nahimong unod, og napadayag.

<sup>56</sup> Ug mahitungod niini, dili nato mahilambigit kini sa bisan unsa nga iglesia sa kalibutan karong panahona, sa bisan unsa nga denominasyon. Ang unsa mang dapit nga sama niana, dili nato puedeng ihilambigit niana, tungod kay dili man kini ingon niana. Ginapahimutang nato ang Ngalan ni Cristo diha sa usa ka bilding, ginatawag kini nga mga iglesia ni “Cristo,” ug *ingon niini*, *ingon niana*, o *uban* pa. Dili man kana ingon niana. Dili kana ingon niana, gayud. Apan sa diha nga ginapahimutang sa Dios ang Iyang Ngalan diha sa usa ka butang, mao na kana.

<sup>57</sup> Karon, walay unsa mang butang sa Biblia nga mahimong tipo sa atong modernong mga organisasyon, gawas sa Babilonia. Mao lang kana ang tipo nga anaa sa Biblia bahin sa atong modernong organisasyon, giorganisang relihiyon, tungod kay

gitukod man kana ni Nimrod ug usa ka pinugos nga panaghiusa sa relihiyosong mga tawo. Ug ingon niana usab ang ginabuhat sa mga kredo ug sa atong mga denominasyon karong panahona, pinugos nga panaghiusa, “Kinahanglan miyembro ka niini kay kon dili palagputon ka!” Ug paingon na kita karon, sama sa atong makita, nga ginapugos na ang tanan ngadto sa usa ka dakung panaghiusa niini. Apan usa ra kana ka mekanikal nga mando nga hinimo sa usa ka tawo, ug dili kana makabarug. Dili man gud kana kabubut-on sa Dios. Dili pud kana programa sa Dios. Bisan unsaon pa sa mga tawo sa pagpaningkamot nga isulti nga ingon niana kono kana, pero dili gayud. Dili kana mamahimo. Imposible gyud kana, nga mahitabo ang ingon-ana. Dili ipahimutang sa Dios ang Iyang Ngalan sa ingon-anang butang nga ginasalikway ang Iyang Pulong. Unsaon man pagpuyo sa Dios diha sa usa ka butang nga ginasalikway ang Kaugalingon Niyang Pulong? Dili Niya mahimo kana.

<sup>58</sup> Busa nahibaloan nato, nga dili diay kana mahilambigit sa bisan unsa nga iglesia, Methodist man, Baptist, Presbyterian, Pentecostal, Katoliko, Greek Orthodox, og unsa man kana. Dili kana mao’y dapit sa Dios sa pagsimba, bisan pa man.

<sup>59</sup> Karon tugoti ang Dios, nga Mao’y nagsaad niini, nga moanhi ug pamatud-an kini, nga husto kini. Kinahanglan sa ingon nianang paagi kini buhaton. Kung Siya’y Dios sa gihapon, nan Siya’y Dios gayud hangtud karon! Kung Dios man Siya kaniadto, nan nagpabilin gihapon Siya nga Dios!

<sup>60</sup> Ug karon makita nato kining pinugsanay nga relihiyon, sa ingon ka klaro gayud, aron dalhon ang tanang gagmay’ng mga pundok ngadto sa “usa ka dakung panaghiusa,” sama sa tawag nila niini. Ang uban kanila nagatoo sa *ingon niini*, ug ang uban nagatoo ’sab sa *ingon niana*; ug ang uban nagasalikway *niini*, ug ang uban nagasalikway *niana*. Miingon ang Biblia, “Unsaon man pagkakuyog sa duruha gawas kon sila magakauyon?” Dili gayud kana magpulos.

<sup>61</sup> Kinahanglan nga managkauyon kita. Ug managkauyon sa unsa? Dili ingon nga managkauyon sa usa’g usa, kondili kinahanglan nga managkauyon kita diha sa Pulong, diha sa Dios. Mao gyud kana’y kinahanglan nga pagka-uyonan.

<sup>62</sup> Karon nahibaloan pud nato, nga ang usa ka pinugsanay nga panaghiusa girepresentar sa mga grupo sa mga tawo sa Babilonia. Dili gyud maipahimutang sa Dios ang Iyang Ngalan sa ingon nianang butang. Wala gyud Niya gibuhat sukad ug dili gayud Niya pagabuhaton. Bisan pa’g gisulayan na nila kana, gipahimutang ang ilang ngalan diha niana, gipahimutang ang Iyang Ngalan diha niana, apan dili man kana ingon niana.

<sup>63</sup> Ug kinahanglan gyud natong mahikaplagan kon diin Niya gipahimutang ang Iyang Ngalan, tungod kay mao kana ang dapit ug ang bugtong dapit nga Iyang gitagana aron pagaadtoan sa

mga Cristohanon, ug sa nagatoo nga mga anak, ug simbahon Siya diha niini nga dapit. Unsa kaha nga dapit kini?

<sup>64</sup> Karon aron pamatud-an kini, mahimo natong tan-awon ang tibuok Biblia aron suportahan ang akong isulti. Kay, ang dapit nga Iyang gipili anaa man diha kang Cristo, kang Jesus Cristo. Anaa kini diha Kaniya, sa Iyang Anak; ang Anak sa Dios, si Jesus Cristo.

<sup>65</sup> “Bueno,” moingon ka, “Abi ko og mabasa dinhi sa Kasulatan nga miingon Siya nga pagapilion Niya ang dapit, ug ipahimutang Niya usab ang Iyang ‘Ngalan’ diha niana nga dapit.”

<sup>66</sup> Bueno, kanunay man nga ginadala sa anak ang ngalan sa iyang amahan. Ang akong ngalan mao si Branham tungod kay ang akong amahan mao si Branham.

<sup>67</sup> Ug miingon si Jesus nga mianhi Siya sa Ngalan sa Iyang Amahan. San Juan 5:43, “Mianhi Ako sa Ngalan sa Akong Amahan ug wala ninyo Ako dawata,” busa dinha gipahimutang sa Dios ang Iyang Ngalan, ilalum sa paghalad sa Kaugalingon Niyang Anak! Mao kana ang bugtong dapit nga gitagana sa Dios. Dinha kon diin matagbo sa mga tawo ang Dios, diha kang Cristo. Mao kana ang gitagana Niyang dapit. Dili denominasyon, dili kredo, og dili bisan unsa pa man, ang gisaad sa Dios nga tagboon. Diha kang Jesus lamang Siya makigtagbo, kay mao man kana ang bugtong dapit kon diin gipahimutang ang Iyang Ngalan.

<sup>68</sup> Madungog usab nato si Jesus, sa pagbasa ko sa Kasulatan, sa Juan, Juan ang ika-5 nga kapitulo ug ika-43 nga bersekulo, miingon Siya, “Adunay lain nga moanhi, ug moanhi sa iyang ngalan, ug siya inyong pagadawaton.” Mahimo kitang magpamiyembro sa usa ka kredo nga, “lahi,” mahimo pud kitang magpamiyembro sa usa ka denominasyon, og inyong dawaton kini; apan pag dawaton ninyo si Jesus, lahi na kana. “Adunay lain nga moanhi, ‘Moingon ko nga ako’y Methodist, Baptist ako, Presbyterian ako,’ dawaton gyud ninyo kana. Apan mianhi Ako sa Ngalan sa Akong Amahan, nga ginabuhat kung unsay gisulti sa Amahan nga Akong pagabuhaton, ug wala ninyo Ako dawata.” Miingon Siya, “Mianhi si Juan, ug aduna siya’y dakung panghimatuod, apan aduna Ako’y mas dakung panghimatuod sa Dios—sa Dios nga labaw pa kay sa gibuhat ni Juan. Kay ang gipiyal Kanako sa Amahan nga pagabuhaton, kana ang ginabuhat Ko,” mga Pulong nga nahisulat na mahitungod Kaniya, kung unsa gayud Siya sa nianang adlaw. Kay Siya kaniadto . . .

<sup>69</sup> Dios ang Iyang Ngalan. Adunay daghang mga titulo ang Dios. Ngani ang *Dios* usa ra man ka titulo, Mismo, nga gitawag og Jehovah-jireh, Jehovah-rapha, Jehovah-manasseh. Siya’y gitawag pud nga Rosa sa Saron, Lirio sa Kawalogan, Bitoon sa Kabuntagan; Alfa, Omega, Sinugdanan ug Katapusan;

dayon Amahan, Anak, Espiritu Santo; og ang tanan niini mga titulo ra.

<sup>70</sup> Apan ang Iyang Ngalan, ang Ngalan sa Dios mao si “Jesus Cristo,” ang Maong Dinihogan. Mao kana ang Iyang Ngalan. Aduna Siya’y daghang mga titulo, apan usa ra ka Ngalan, ang nag-inusara, “Wala na’y laing Ngalan sa silong sa Langit nga gihatag sa tawo, nga pinaagi niini mamaluwas kamo.” Hingsayran nato nga tinuod gyud kana.

<sup>71</sup> Sa niini nga pasidaan usab, nga, “Pag moabot kining usa pa, nga moabot siya sa iyahang ngalan, ‘Methodist, Baptist, Presbyterian, Pentecostal,’ og uban pa, pagadawaton ninyo siya. Magpasakop kamo kaniya.” Apan gisalikway diay si Cristo. Gisalikway nila Kana.

<sup>72</sup> Miingon ang propeta! Susihon ’sa nato ang Iyang Ngalan diyutay. Miingon ang propeta, “Ang Iyang Ngalan pagatawgon ‘Emanuel.’” Karon, gisulti kana ni Isaias, sa mga ika-7 nga kapitulo. Ug usab sa Mateo 1:23, miingon, “Nahitabo kining tanan, sa pagtuman sa gisulti sa Ginoo pinaagi sa propeta, nga nagaingon, ‘Ang Iyang Ngalan pagatawgon *Emanuel*, nga ang kahulogan mao kini, “Ang Dios uban kanato.””

<sup>73</sup> Emanuel, ug ang Iyang Ngalan mao si Jesus, ang Dios uban kanato, nga dala ang Ngalan sa Iyang Amahan. Mianhi Siya sa Ngalan sa Iyang Amahan. Dinha gipahimutang sa Dios ang Iyang Ngalan, diha sa Iyang Anak. Mao lang kana ang bugtong dapit nga mahimo ninyo Siyang simbahon. Ang bugtong dapit nga mahimo kamong tagboon sa Dios, mao’y diha nianang Anak nga gitipo sa hinalad nga karnero. Ug sa kinatibuk-an sa Daang Tugon, ang kinatibuk-an niana nagahatag og mga tipo bahin nianang usa ka butang, niana nga dapit lamang, nga ang Dios, mismo, nakigtagbo ilalum sa hinalad nga dugo; ang bugtong dapit diin Siya nakigtagbo kaniadto. Ang bugtong dapit diin nagapakigtagbo Siya karong pananoha: dili diha sa ngalan sa kredo, o sa ngalan sa usa ka denominasyon, ngalan sa usa ka iglesia, o ngalan sa usa ka pundok, o kaha ngalan sa usa ka kapunongan, kondili diha sa Ngalan ni “Jesus Cristo!”

<sup>74</sup> Nasulayan ko na kana kaniadtong usa pa ako ka batan-ong lalaki. Sige kong madungog kaniadto ang mahitungod sa espiritismo, ang mahitungod sa yawa, kung ginaunsa niya pagbuhat ang mga butang. Ug nasayod ko nga kung aduna ma’y Dios, siguradong aduna gyu’y yawa, tungod kay miingon man ang Biblia nga adunay yawa. Ug siya, sa hunahuna ko. . . nakadungog mahitungod niining mga espiritista. Nakaadto na ko sa uban kanila, og hingsayran ko nga sila’y mga dili-tinuod, nga mga espiritista, og mga nagpakaaron-arong lang. Apan hingsayran ko usab nga aduna pud og pipila kanila nga mga tinuod gyud nga espiritista.

75 Atua ako sa kampo usa ka higayon, diin ako ug ang usa ka ministro nangadto didto aron tan-awon sila. Gipalutaw nila ang lamesa gikan sa salog, ug adunay mga baso sa whiskey nga nakapatong niadto; ug gipalutaw kadtong lamesa, gipatuyok-tuyok pa gyud kadto. Ug dihay usa ka gitara nga gipalutaw-lutaw usab sa tibuok biding; og mga sinina pud sa mga tawo. Gipalutaw-lutaw kadto, sulod sa maong lawak. Miingon, miingon kadtong espiritista, “Ginahagit ko ang si kinsa man nga ipapanaug kana.”

76 Miingon ang duha ka tawo, “Ipapanaug namo kana.” Gibira nila ang mga tiil sa lamesa nga *ingon niana*, ug gipaningkamotang hawiran kadto. Wala gyud mahulog. Aba, gipalagpot lang sila niadtong lamesa ngadto sa salog.

77 Mao nga dili lang maglingkod-lingkod. Kung wala ka pa nahimong misyonaryo ug wala pa nakaadto sa mga natad sa pagpangmisyon, ang nahibaloan mo lang kana’y ideya mahitungod sa yawa. Kung motan-aw kamo dinhi sa pipila niining mga tawo nga nagalakaw sa kadalanan, makita ninyo siya. Apan aduna gyu’y yawa! Sigurado gayud.

78 Ug ginasimba sa mga tawo ang yawa, wala lang sila nasayod sa ilang ginabuhat. Ginasimba nila ang yawa sulod sa kaiglesiahan, “Gipaka-Doktrina ang mga kasugoan nga iya sa tawo, ang mga kredo—mga kredo ug mga tradisyon.” Ug ingon ko . . .

79 Gisingitan ako niining babaye, ug miingon, “Giingnan nila ako nga usa kono ikaw ka magwawali.”

Ingon ko, “Oo.”

80 Ingon siya, “Dayon kung dili ikaw . . .” Miingon, “Unsa ma’y hunahuna mo mahitungod niini?”

Ingon ko, “Ang yawa kana.”

81 Ug ingon siya, “Bueno, kung ingon-ana, kung aduna ka ma’y dakung gahum, nan ipapukan kana.”

82 Ingon ko, “Wala man ko’y bisan unsa nga gahum, wala gayud. Wala ako’y gahum, apan ania ako nga ginarepresentar ang Usa nga may gahum.”

83 Ingon ko, “Ginoong Jesus, miingon man Ka, diha sa San Marcos sa ika-16 nga kapitulo, ‘Sa Akong Ngalan pagahinginlan nila ang mga yawa.’” Ingon ko, “Karon, aron masayod ang Imong alagad, samtang ang maong gubat ania sa akong atubangan!”

84 Ingon ko, “Ginamandoan ko kanang lamesa nga mahulog, sa ngalan sa ‘balaan nga Iglesia,’” ug nagpabilin ra kadto mismo didto. Ingon na pud ko, “Ginamandoan ko kanang lamesa nga mahulog dinha, sa ngalan sa ‘Amahan, Anak, ug Espiritu Santo,’” nagpabilin ra gihapon kini didto. Miingon na ko, “Ginamandoan ko kanang lamesa nga mahulog, sa Ngalan

ni ‘Jesus Cristo,’” ug halos nabuak mismo ang upat ka tiil, nga nangahulog sa salog!

<sup>85</sup> “Sa Akong Ngalan pagahinginlan nila ang mga yawa!” Mao kana ang Ngalan sa Amahan. Gipahimutang Niya ang Iyang Ngalan kang Jesus Cristo. Ug diha Kaniya nagapakigtambo Siya, alang sa pagsimba. Diha Kaniya nagapakigtambo Siya, aron hinginlan ang mga yawa. Diha Kaniya nagapakigtambo Siya, aron ayohon ang mga may sakit. Diha Kaniya nagapakigtambo Siya, aron mangluwas. Diha Kaniya nagapakigtambo Siya, aron mangluwas, og magpuno og Espiritu Santo. Mao lang kana ang bugtong dapit sa Dios nga tagboon ang mga tawo alang sa pagsimba. Karon hingsayran nato nga si Jesus miingon usab nga . . . Ang pulong, ang Ngalan nga *Jesus*, nagakahulogan og “Jehova’ng-Manluluwas,” Jehovah nga Manluluwas.

<sup>86</sup> Hinumdumi, “Dili ka magasimba sa Ginoo . . .” 5, bersekulo 5, “Dili ka magasimba sa Ginoo sulod sa bisan unsa nga ganghaan, nga gihatag kanimo sa Ginoong Dios. Sa bisan unsa nga ganghaan, dili ka magasimba Kaniya dinha,” miingon ang Dios, sa ika-5 nga bersekulo dinhi, sa Deuteronomio 16. “Dili ka magasimba Kaniya sulod sa bisan unsa nga ganghaan, nga gihatag kanimo sa Ginoong Dios. Gihatag Niya kanimo kining mga butanga ingon nga panulay.” Moabot ra kita dinha, niining semanaha, kon itugot sa Ginoo, og tan-awon kon ginabakwi ba sa Dios ang Iyang Pulong, o dili. Himatikdi, gihatagan Niya ikaw og mga ganghaan, apan ayaw simbaha ang Ginoo sa bisan asa man niana nga mga ganghaan, tungod kay ang Ginoo nga imong Dios dili gayud makigtambo kanimo dinha.

<sup>87</sup> Apan ang Ginoong Dios ang nagpili sa ganghaan. Siya ang nagpili sa pultahan. Miingon si Jesus, sa San Juan sa ika-10 nga kapitulo, “Ako mao ang pultahan ngadto sa toril sa mga karnero. Ako ang pultahan.” Siya mao si Jehova’ng-Manluluwas.

<sup>88</sup> Karon mahimo man natong magpadayon dinhi sa pipila ka oras, sa pagsaysay niini. Apan sigurado ko nga nasabtan na ninyo kini, sumala sa inyong panglihok, nga kamo—kamo nagatubag sa Kamatuoran ug sa Pulong. Busa dili na kita magsaysay pa og dugang, puede man ninyong subayon kini sa bisan asa nga gustohon ninyo. Bisan asa kamo moadto, kung Kamatuoran man kini, motakdo gayud kini mismo sa uban pa nga bahin sa Pulong. Dili n’yo mahimong pasultihon ang Biblia og usa ka butang sa usa ka bahin, ug usa na pud ka butang sa ubang bahin, tungod sukwahi na kini sa una Niyang gisulti. Kinahanglan nga mao ra gihapon kini sa tanang panahon.

<sup>89</sup> Ginalaktawan ko na ang daghang Kasulatan dinhi mahitungod niini, tungod kay nakita ko man gud nga medyo nagka-hapon na. Ug ang atong igsoong babaye ug ang uban pa magpahigayon baya og panerbisyo dinhi unyang gabii, ug gusto pud natong mag-ampo para sa mga may sakit. Mao kana, ug



hibaloa 'usa, Billy, kung aduna na ba kaha sila'y mga prayer kard.

<sup>90</sup> [Adunay nagaingon, "Wala ma'y panerbisyo unyang gabii."—Ed.] Walay panerbisyo. Maayo. Maayo, hinoon. Sige. Karon hibaloon 'sa nato kana. Okey. Sige. [Nagapalakpak ang kongregasyon.] Nagasalig kita nga panalanginan sa Ginoo kining maong babaye tungod niini, nga gitugotan kitang gamiton kini nga dapit, og gihatagan kita niini nga kahigayonan.

<sup>91</sup> Daghan kaayong dili-masayup nga mga kapanghimatuoran nga si Jesus ang maong dapit. Siya mao ang ganghaan, Siya mao ang Ngalan, ug ang bugtong gitagana nga paagi sa Dios para nga ang tawo pagatagboon Niya diha sa pagsimba. Siya mao ang Dalan, ang Kamatuoran, ang Kinabuhi; ang Ganghaan, ang Pultahan; ang Alfa, Omega, ang Sinugdanan ug ang Katapusan; Rosa sa Saron, ang Lirio sa Kawalogan, ang Bitoon sa Kabuntagon; ang Alfa, og Omega. Siya ang tanan, ang kinatibuk-ang butang nga gihiusa. Siya'y parehong Gamut ug Kaliwat ni David, ang Masiga nga Bitoon sa Kabuntagon. Diha Kaniya nagapuyo sa pagkalawas ang bug-os kinatibuk-an sa Pagka-Dios, diin dinha kita'y mga anak nga lalaki ug mga anak nga babaye sa Dios, sa pagka-Dios sa Dios. Oo. Ingon nga mga anak nga lalaki ug mga anak nga babaye, kita'y kabahin sa maong pamilya, kung ikaw man anaa dinha.

<sup>92</sup> Karon unsaon man nato pagpakasulod sa niining halangdon nga dapit alang sa pagsimba? Mao kanang sunod nga pangutana. Unsaon nato pagpakasulod niini nga dapit, kung si Jesus man mao ang dapit? Siya mao ang Ngalan sa Dios. Siya mao ang dapit sa pagsimba sa Dios. Ug Siya lamang ang bugtong pultahan ngadto sa toril sa mga karnero. Ug buut natong mahibaloan kung unsaon nato pagpakasulod Kaniya kung ingon-ana.

<sup>93</sup> Karon, kung anaa ka sa pultahan, siyempre, mosulod ka nga sama sa pamilya, maingon sa atong gikahisgotan niadtong miaging adlaw mahitungod, sa . . .o sa pagpamahaw, mahitungod sa gamay'ng karnero, nga dili 'una pagasirhan sa Dios ang pultahan hangtud nga makaplagan niya kanang gamay'ng karnero ug pasudlon kini. Kung nakasulod ka na, nan kabahin ka na sa pamilya. Kabahin ka sa pamilya sa Dios pagnakasulod ka na sa Dios. Apan dili ka mamahimong kabahin sa Dios ug usab mahimong Presbyterian, Methodist, Baptist, ug Pentecostal. Dili kana mamahimo. Kinahanglan gyud nga makasulod ka kang Jesus Cristo.

<sup>94</sup> "Bueno," moingon mo, "nabuhat man namo ang ingon-ana." Atong tan-awon kung nabuhat ba gyud kaha ninyo.

<sup>95</sup> Hibaloon nato kung unsay ginaingon sa Biblia karon. Atong makita, sa Unang Mga Taga-Corinto, sa ika-12 nga kapitulo, miingon ang Biblia, "Pinaagi sa usa ka Espiritu

kitang tanan gibautismohan pasulod ngadto sa usa ka Lawas.” Gibautismohan kita ngadto sa Lawas ni Cristo, pinaagi sa usa ka Balaang Espiritu. Wala kita misulod pinaagi’g pakiglamano, wala kita misulod pinaagi’g pagpamiyembro, wala kita misulod pinaagi’g pabautismo sa tubig. Gibautismohan kita pinaagi sa Espiritu Santo, pasulod ngadto sa Lawas ni Jesus Cristo.

<sup>96</sup> Unsa man kana ka dugay molungtad pagmakasulod ka na Dinha? Hangtud ba nga mobuhat ka mismo og di-maayo? Nagaingon ang Mga Taga-Efeso 4:30, “Ayaw ninyo pagpasuba ang Balaang Espiritu sa Dios, nga giselyohan kamo hangtud na sa adlaw sa inyong pagtubos.” Pakiglantugi mo Kaniya, dili kanako. Mao kana ang ginaingon Niini. Ginabasa ko lang Kini. Oo. “Giselyohan kamo hangtud na sa adlaw sa inyong pagtubos,” hangtud na sa adlaw nga moanhi si Jesus para kaninyo.

<sup>97</sup> Kung ingon niana, hunahunaa kini, dili ka na ikaw sa imong kaugalingon, usa ka na ka bag-ong linalang, o sa Griyego nagakahulogan og “usa ka bag-ong linalang.” Gilalang ka na pag-usab. Ang gahum sa Dios nagaabot kanimo, ug gilalang ka, nga usa na ka bag-ong linalang; nga ginapailalum ang tibuok mong pisikal nga pagkatawo, espirituhanong pagkatawo ug tanan na, sa Pulong sa Dios. Wala na’y uban pang paagi!

<sup>98</sup> Unsaon man nimo pagpakaingon nga usa ikaw ka Cristohanon, ug wala diay ginatuman ang Iyang Pulong? Ang si kinsa man nga wala nagtuman sa kasugoan sa usa—usa ka bahin Niini, wala nagatuman sa tanan Niini. Ang si kinsa man! Miingon si Jesus, “Ang tawo dili mabuhi sa tinapay lamang, kondili sa matag Pulong nga nagagula sa baba sa Dios.” Dili nga bahin lang sa mga Pulong; kondili matag Pulong! Miingon Siya diha sa Pinadayag sa ika-22 nga kapitulo, “Ang si kinsa man nga magataktak og usa ka Pulong gikan niini nga Basahon, o magadugang og usa ka pulong ngadto Niini, pagataktakon ang iyang—iyang bahin gikan sa Basahon sa Kinabuhi.” Dili kita angay’ng magataktak gikan sa Biblia, o magadugang man ngadto Niini. Isulti lang kung unsay ginaingon Niini.

<sup>99</sup> Ug sa Unang Mga Taga-Corinto 12, miingon Kini, “Pinaagi sa usa ka Espiritu kitang tanan gibautismohan ngadto sa usa ka Lawas.”

<sup>100</sup> Karon human nga maanaa ka na niini nga Lawas, miingon ang Mga Taga-Roma 8:1, “Busa karon walay pagkahinukman sa silot niadtong mga anaa na kang Cristo Jesus, nga wala nagakinabuhi uyon sa unod, kondili uyon sa Espiritu.” Mao kana ang dapit kon diin wala na’y pagkahinukman sa silot. Motambong ka man sa usa ka Methodist, Baptist, og Presbyterian nga iglesia, asa man kana; kung anaa ka na kang Cristo, nan usa ka na ka bag-ong linalang, ug wala na’y hukom sa silot diha kanimo, wala na gayud. Mao kana ang tagboanang dapit sa Dios. Dinha ginatagbo sa Dios ang magsisimba. Dinha

kon diin giisip ka nga usa na ka bag-ong linalang, tungod patay na man sila sa mga butang nga iya sa kalibutan. Sila'y buhi diha Kaniya. Ang buhing Presensiya sa Dios nagauban kanila, sa matag adlaw.

<sup>101</sup> Nagapuyo Siya kanila, sa matag kapanahonan. Sa matag kapanahonan nga nagaabot, diha sa Biblia, sa diha nga matagbo sa tawo ang gikinahanglan sa Dios, mosulod sa dapit kon diin Niya gihatag ang Iyang simulat nga Pulong alang niana nga kapanahonan, nan ginahimo sa Dios kana nga tawo nga usa na ka bag-ong linalang, ug dili na siya hinukman sa silot. Matikdi n'yo si Job.

<sup>102</sup> Ginapabungol ko ba kamo, pinaagi sa akong pagsulti dinhi niining mga mikropono? Pasayloa ko tungod niini. Nasayod ko nga tungod kini sa paglanog dinhi. Madungog ko man 'sab kini dinhi, mismo.

<sup>103</sup> Apan, matikdi. Si Job, bisan unsa pa ka daghan sa mga tawo nga nanagsulay sa paghukom kaniya, unsa pa ka daghan ang nanagsulti nga sayup siya, natuman gihapon niya ang kasugoan sa Dios, tungod niadtong mga halad-nga-sinunog. Nasayod siya nga gimatarung na siya, tungod kay ginatuman man niya ang mga sugo sa Dios. Sa ingon niana nga paagi siya gimatarung, tungod kay ginabuhat man usab niya ang mga butang nga gusto sa Dios nga iyang pagabuhaton.

<sup>104</sup> Ang buhing Presensiya sa Dios ang nagadan-ag sa adlaw, matag adlaw, gikan sa pagkamatay sa mga kredo, paingon sa Kinabuhi ug paingon sa Pulong para sa maong adlaw. Bueno, aduna gyu'y mga butang ang Dios nga Iyang ginabuhat.

<sup>105</sup> Sama sa usa—usa ka gamay'ng bulak, sumala sa akong gisulti niadtong miaging buntag sa pagpamahaw. Sa diha nga ang binhi madan-agan sa kahayag, mosugod na kini sa pagtubo. Nagainom kini gikan sa tuburan sa Dios, padayon nga nagatubo hangtud nga moabot kini sa pagpangudlot, og nagatubo paingon sa pagka-bulak, paingon sa pagpamulak.

<sup>106</sup> Karon hingsayran nato, nga sa dihang nagasugod kita diha kang Cristo, nagatubo usab kita sa mao rang paagi, tungod kay nagatubo man kita diha sa grasya ug sa pagpahimatngon sa Dios.

<sup>107</sup> Ang bugtong gitagana nga plano sa Dios, alang sa unsa mang kapanahonan, mao gayud ang Iyang Pulong. Mianhi ang Iyang Anak ug gipadayag ang matag saad nga gikasaad alang sa Iyang kapanahonan. Miabot ang tanang mga propeta sa ingon ka tukma gayud nga panahon, sila mao ang Pulong sa Dios nga nagapuyo sa yuta. Sila mao ang Pulong. Ngani miingon man si Jesus nga sila'y "mga dios." Gitawag ni Jesus ang mga propeta nga, "mga dios."

<sup>108</sup> Usa ka tawo ang miduol kanako sa ulahi ko nga panagtigum, miingon siya, "Usa ikaw ka barot nga teologo."

109 Ug miingon ko, “Wala man ko nagaangkon nga usa ako ka teologo.” Ingon ko, “Ang Pulong wala nagaabot sa usa ka teologo; teolohiya ang nagaabot kaniya.” Ang Pulong nagaabot. . . Kita n’yo? Ingon ko, “Teolohiya lang ang nagaabot nganha sa usa ka teologo. Apan,” miingon ko, “lahi man nga butang ang atong ginahisgotan.”

110 Karon hingsayran nato nga, sa matag kapanahonan, pag miingon ang Dios nga mahitabo ang usa ka butang, ania nagaabot kana nga tawo ug gipahayag kana, ania nagaabot kana nga mga tawo ug gikinabuhi kana. Kana mao ang Dios Mismo nga nagapuyo diha sa maong mga tawo, tungod kay katumanan man kana sa Iyang Pulong.

111 Karon, ang bugtong gikatagana nga paagi sa Dios ug bugtong gikatagana nga plano, karong panahona, mao ang Iyang Anak, pinaagi sa Iyang Pulong alang niini nga kapanahonan, nga gibuhi pinaagi sa Espiritu sa Iyang Kinabuhi, gihimong buhi.

112 Karon aduna kita og mga eskwelahan sa teolohiya. Ug sa makadaghan nang higayon nga sa dihang buhaton nato kana. . . . Wala ko’y unsa man nga batok niana, wala gayud. Apan, nakita n’yo, pag aduna man gud ka og eskwelahan sa teolohiya. . .

113 Miingon si Jesus, sa San Juan 4, “Moabot ang panahon, ug karon miabot na, sa dihang ang Dios, ingon nga usa ka Espiritu, pagasimbahon sa Espiritu ug sa Kamatuoran.” Karon ang ubang mga tawo aduna kanila ang Espiritu, pero wala kanila ang Kamatuoran. Ang uban pud aduna kanila ang Kamatuoran, pero wala kanila ang Espiritu.

114 Busa sama lang kana nga kung aduna kita og usa ka dakung sakyanan, nga mobiyaha kita diha sa usa ka Cadillac. Ug managsama ra ang pagkahimo sa mga Cadillac, ug ituklod nato kini dinhi ug atong. . . tubilan ang mga tangke, ug pareho natong tubilan kini og gasolina. Ug sige mong paandaron ang usa niining duha. Bueno, imong tan-awon, og moingon, “Okey man ang lingkoranan. Nindot man pud ang manobela, aduna pa gani kini og mga diyamante. Ug mahalon kaayo, nindot gayud kini. Oh, makalingkod ka nga hayahay ug makatulog pa.” Ug, oh, daghang mga butang ang mahimo mo, sa kada usa, apan, nakita n’yo, ang usa niana. . . Pareho silang ma’y hustong mekanika, apan ang usa ra niana ang adunay dinamika. Nakita n’yo, mahimong nasayod ka sa mekanika, apan kinahanglanon pa man ang dinamika aron mapaandar ang mekanika, aron moandar kini.

115 Ug ingon niana pud ang nagakahitabo sa iglesia sa karon. Puno kita og teolohiya, nga wala man lang og dinamika. Husto kana. Kita n’yo?

116 Sa laing pagkasulti, kinahanglan mo ’unang magkaaduna og aligato para sa gasolina, o ang gasolina pareho ra nga. . .

halos pareho ra kana sa tubig, kung wala kana og aligato aron mopasiga niana. Busa, ingon-ana kana.

117 Bisan unsa pa kita ka gikatudloan og ayo, sa kung unsa nga nagatoo gayud kita, ug unsa pa ka daghan ang mahitungod sa Biblia nga atong ginaingon nga tinuod, ug ginatoohan natong matuod kini tanan, kinahanglan ang—kinahanglan ang dinamika nga maanaa gayud dinha, ang kalayo, aron paandaron kanang Pulonga, og aron mosugod Kining mamuhat. Kinahanglan Kining magkaaduna niana. Kay kung dili, nan magapabilin ra ang iglesia, magpabilin ra nga dili-moandar ang sakyanan, magpabilin ka lang nga maglingkod. Apan bisan unsaon pa nimo sa pag-ingon, “Nagauyon ako. Nagatoo ako sa matag Pulong Niana.” Kinahanglan mo gayud nga magkaaduna og usa ka butang nga mao’y mopasiga niana, aron magpadilaab nianang usa ka gatus nga octane, ug aron mapaandar ang dakung Iglesia sa Dios. Kinahanglan niining magkaaduna og dinamika uban ang mekanika. Walay unsa mang sayup sa mekanika, apan wala lang og dinamika.

118 Ug sa hunahuna ko ingon niana gayud ang nagakahitabo sa iglesia karong panahona, wala kita nianang gahum pang-dinamika, aron mapapadayon kining Pulong ug himoon Kining buhi alang niini nga panahon.

119 Si Martin Luther aduna man og mekanika ug dinamika, sa iyang adlaw kaniadto. Si John Wesley aduna usab niini, sa iyang adlaw. Ang Pentecostal aduna pud niini, sa ilang adlaw kaniadto.

120 Unsa man pud sa atong adlaw? Lahi na usab kini nga panahon! Kinahanglan bug-os na gyud nga mitubo ang Iglesia sa karon, nga andam nang makigtagbo kang Cristo, nga aduna na’y kapadayagan mahitungod sa tanang panalangin nga Iyang gisaad diha sa Biblia, nga nagapanglihok na nianang usa ka halangdong Lawas diin gisaad Niya nga Iyang tagboon ang maong mga tawo ug nga Siya pagasimbahon, niining halangdon Niyang Iglesia.

121 Apan, nakita n’yo, ginapaeskwela nato ang atong mga anak, ginapatuon nato og pagbasa, pagsulat, aritmetik, og tibuok kasaysayan mahitungod sa mga propeta ug tanan na. Okey lang man kana, apan gawas kung aduna ka og usa ka butang nga mopaluyo niana!

122 “Oh,” moingon ka, “bueno, ako—nakasinggit man ako. Nakasulti man ako og laing mga dila.” Maayo man kana. Nagatoo ko niana, usab. Apan dili kana mao’y akong ginahisgotan karon. Kita n’yo, kamo’y—kamo’y... magpurot-purot kana. Moingon ka, “Plank-plank, boomp-boomp,” sama sa usa ka karaan na nga sakyanan nga ginapaningkamotang paandaron. Moingon ka, “Oo, nagatoo man ko *niini*. Nagatoo ko

*niana*, usab. Apan, apan paghisgotan na ang bahin *niini*, niini nga mga adlaw, oh, dili. Dili!”

<sup>123</sup> Aduna siya’y usa ka gatus nga octane, igsoon, nga may husto nga matang sa generator sa luyo niya, og ipabiti niini ang matag Pulong sa Dios ngadto sa saad Niini. Husto kana.

<sup>124</sup> Ingon niana usab ang nagakahitabo kanato sa karon, halos pa-hunong na kita. Ang gusto nato’y motoo *niini*, motoo *niana*.

<sup>125</sup> Pag-aduna ko’y isulti, mahitungod Niini. “Bueno, wala ako mahibalo.” Bueno, ingon niana ang gisulti sa Biblia! Mao na kana. Kung mao kana ang giingon sa Dios, nan gisulti kana aron gyud matuman. Kung kita. . . Kung ingon niana ang gisulti sa Dios nga pagabuhaton, nan kinahanglan natong buhaton kana. Magpabilin ka mismo dinha hangtud nga paandaron na sa Dios, ug direktso ka nang magapamuhat pag-usab, nakita n’yo. Kay kung dili, nan matay-an gayud ang mga spark plug. Ug busa nagkinahanglan kita og butang nga lahi, nagkinahanglan kita og usa ka butang nga magpaandar gyud kanato.

<sup>126</sup> Dayon matikdi, dili lang nga nagasulod Siya pinaagi sa Balaang Espiritu, tungod sa pagtuon sa Iyang Pulong, ginapahayag Niya usab kana nga Pulong. Karon hinumdumi, ginatohan sa mga propeta ang Pulong. Ginadawat nila ang Pulong sa Dios. Ug ang Dios nga Balaang Espiritu misulod kanila ug ginapaandar kana nga saad, ug gipahitabo kini. Oh, grabe! Kinsa ma’y mohukom niana?

<sup>127</sup> Miingon si Jesus, “Kinsa ba ang makahukom Kanako og silot tungod sa sala? Ang *sala* mao’y ‘dili-pagtoo.’ Unsa ma’y gisulat sa Dios ug unsa ma’y gisulti sa mga propeta, Ako mao ang Katumanan. Kung unsay gisulti nila nga Akong pagabuhaton, gibuhat Ko.” Mianhi Siya ingon nga usa ka propeta, ang Anak sa tawo. Eksaktong ingon niana Siya, ug kung unsa gayud ang Iyang gipamatud-an. Siya mao gayud. Ngano man? Atua man ang dinamika aron paandaron ang mekanika. Siya mao ang mekanika, ang Anak Mismo, ug ang Amahan mao ang dinamika. “Dili kini Ako ang nagabuhat sa maong mga buhat, ang Akong Amahan kini nga nagapuyo Kanako. Ginapaandar Niya ang—ang—ang dinamika ug ginapalihok ang maong butang. Siya ang nagapahitabo niana.”

<sup>128</sup> “Kanus-a ba Ako misulti og unsa mang butang. . .” Sama ni Samuel nga miingon sa mga tawo usa ka higayon kaniadto, “Aduna ba ko’y gisulti kaninyo sukad og bisan unsang butang, diha sa Ngalan sa Ginoo, kondili ang kung unsa lang ang nagakatuman?” Kita n’yo? “Kanus-a ba ako nagsulti niini sukad, ug kanus-a ba kini nahitabo nga wala natuman?”

<sup>129</sup> “Oh, ikaw, gisulti mo bitaw kanamo kung unsay mahitabo, apan gusto namo og hari bisan pa man.”

<sup>130</sup> Ingon niana usab karong panahona. Gusto ra sa mga tawo nga magpabilin sa ilang diyutay’ng mga ideya. Gusto ra nilang

magpabilin sa ilang mga kredo. Gusto nilang manghawid gyud niini. Dayon maghisgot pa og mahitungod sa usa ka rebaybal sa atong panahon, unsaon man nato pagpakabaton og rebaybal nga nagkalamukat na man ang tanan niini? Gasolina nga nasagolan na og tubig ug tanang uban pa, tanang matang sa mga sabon ug tanan na niining moderno nga mga butang nga gipangsagol na ngadto niini.

<sup>131</sup> Samtang nagalakaw ako sa dalan usa niadto ka adlaw, gikaingon nga, may usa ka matang sa moderno nga sabon, ang ingon, “Dili mo na kinahanglan hugasan pa ang mga plato, ang butang lang nga imong buhaton ituslob lang kana dinha ug haw-ason kana.”

<sup>132</sup> Nakahunahuna ko, “Mamahimo na diay kong usa ka bayani sa akong balay.” Miadto ako ug mipalit ko og usa ka karton niadto nga sabon.

<sup>133</sup> Ug giingnan ko ang akong asawa, “Sulod na, honey, ako na ang maghugas sa mga plato.”

<sup>134</sup> Sa hunahuna ko, “Aba, siguradong nasayod gyud kaha kana nga mga tawo sa ilang ginasulti, kanang mga siyentista. Ipakita ko sa akong asawa kung unsaon. Akong, iyang. . . hangtud nga makita gyud niya kining, akong ginabuhat. Ituslob lang kono kini ug haw-ason na, mao lang kana ang buhaton.”

<sup>135</sup> Itlog ang gikaon sa mga bata para sa pamahaw niadto. Ug gibubo ko kining sabon didto, ug gituslob ang plato, gihaw-as, ug gituslob na pud ug gihaw-as. Namilit ra gihapon ang itlog. Oo, sir. Mao nga dili na ko motoo pa sa bisan unsa man nga akong madungog sa telebisyon, dili na. Dili, sir. Dili, dili. Dili na, gayud.

<sup>136</sup> Mao kana’y hinungdan nga wala gyud ko nagatoo nga makapadayon ang unsa mang hinimo’g-tawo nga sistema. Aduna ang Dios og usa ra ka gikatagana nga paagi. Dili kini Methodist, Baptist, Presbyterian; kondili si Jesus Cristo kini, pinaagi sa Pagkahimugso pag-usab, nga ginatoohan kining Biblia. Mao kana ang gikatagana nga paagi sa Dios, ug ang bugtong paagi nga aduna Siya, mao’y diha kang Jesus Cristo, nga Iyang Anak. Ug, diha sa Iyang Anak, gipahimutang Niya ang Iyang Ngalan. Kaniya, ang Ngalan sa Dios mao si Jesus, tungod kay Siya mianhi man sa Ngalan sa Iyang Amahan. Ug busa mao kana ang Ngalan sa Dios, tungod kay Siya mao ang Dios.

<sup>137</sup> Karon himatikdi, sa diha nga nagasulod kining dakung nagapamuhat nga gahum sa Dios ngadto sa usa ka anak sa Dios, nagahatag Kini og kinabuhi kaniya, ang Espiritu sa Kinabuhi nagasulod kaniya. Dayon unsa ma’y ginabuhat Niana? Ginapalingkod sila Niini sa mga Langitnong dapit, karon mismo. Dili nga sila’y “palingkoron pa.” Nagalingkod na kita karon mismo. Karon gibanhaw na kita, miandar na ang dinamika ug ang mekanika, gihatagan kita og kinabuhi, ug

gibuhi kita ngadto sa Presensiya sa Dios, kon diin dinha ang Iyang Espiritu. Ug kita karon nagalingkod sa mga Langitnong dapit, diha kang Cristo Jesus; kang Cristo Jesus, nga nagalingkod dinha, nianang halangdong lingkoranan sa . . . nga gipadilaab na, og gibanhaw gikan sa mga patay. Kabahin kita Niini. Kung kabahin ka sa Pangasaw-onon, nan kabahin ka Niya gayud, tungod kay ang Pangasaw-onon kabahin man sa Pamanhonon, kabalo na mo. Busa nahibaloan nato nga kini pareho ra, ug buhaton sa Pangasaw-onon sa ingon ka eksakto kung unsay gikatagna na nga Iyang buhaton sa niini nga adlaw. Dili Siya mamahimong Laodicea, dili usab sa unsa mang pamaagi nga mamahimong dagaang. Kondili Siya'y madasigon gayud sa Dios, og magapadayon diha sa Espiritu sa Dios.

<sup>138</sup> Bueno tan-awon nato dinhi karon aron hibaloan. Karon atong hibaloan, sa niining mao ra nga higayon nga nagakahitabo kini, nga nagaigo kini kanato; ug, kaniadtong, mga patay pa kita tungod sa sala ug paglapas, mga kalapasan, diay, Siya . . . gibuhi kita ngadto sa Iyang Pulong sa niini nga kapanahonan.

<sup>139</sup> Karon atong pamalundongon sa kaniadto pa nga panahon, ang mahitungod sa usa ka tawo nga gibuhi pinaagi niining Pulong; sa dili pa kita magpahigayon og panerbisyo sa pag-ampo para sa mga may sakit. Mokuha 'ta og pipila ka mga tawo, ug tan-awon ang ilang kinaiyahan.

<sup>140</sup> Hisgotan nato ang mahitungod sa usa ka tawo dinhi nga mituman sa tanang Pulong sa Dios, kaniadto sa Daang Tugon, nga ginganlan og Enoch. Gipalagsik kaayo siya pinaagi sa Pulong sa Dios, mao nga aduna siya'y pagpamatuod, nga, "Iyang napahimuot ang Dios." Wala gayu'y ni usa ka butang nga gisugo sa Dios kang Enoch nga pagabuhaton nga wala niya buhata.

<sup>141</sup> Pila kaha ka mga Enoch ang ania dinhi niining hapon, nga, kung nahibalo ka lang nga kini sumala diay sa Pulong sa Dios? Pila man kaninyo nga mugbo'g-buhok nga mga kababayen-an ang nagpatawag sa inyong kaugalingon nga usa ka Enoch, kita n'yo, kita n'yo, ug nasayod nga ginakondena kana sa Dios? Pila ba kaninyo nga mga kalalaken-an, nga ginatugotan ra silang mga kababayen-an nga buhaton ang ingon niana, ang nagpatawag sa inyong kaugalingon nga usa ka Enoch? Oh, grabe! Usa ra kana ka butang, unsa na lang kaha sa mga linibo pa? Ug walay pakabana, moingon pa, "Miyembro ako sa *ingon niini*, ug miyembro ako sa *ingon niana*." Tingali'g miyembro ka man sa ingon niana, apan . . . hangtud nga makasulod ka sa gitagana nga dapit sa Dios! Ug dili ka makasulod dinha gawas kon mamahimo kang kabahin niana nga Pulong. Ug, ingon nga kabahin Niini, mamahimo ka na nga kinatibuk-an Niini, og bug-os nga napailalum. Matikdi, aduna kita niini dinhi nga ginatawag sa Biblia "ang Pulong sa Dios," ug, nga, mao kini ang Pulong sa Dios.



142 Karon hingsayran nato nga misubay si Enoch sa gikatagana nga paagi sa Dios, pinaagi sa Iyang Pulong, ug nagkinabuhi sulod sa lima ka gatus ka tuig, ug nagpahimuot Kaniya. Ug hingsayran nato nga ang mekanika hingpit gayud diha kang Enoch, nga sa dihang miandar ang dinamika diha sa makina, gilalin siya Niini gikan sa yuta. Siya ang pinakaunang mikayab sa biyaheng sama sa eroplano, paingon sa Langit. Tungod sa dungang pagpamuhat sa mekanika ug dinamika sa Dios, bug-os, “siyang wala na hik-it,” tungod kay gisakgaw man siya sa Dios gikan sa yuta, nga wala na’y kamatayon. Husto gayud kana. Nagkinabuhi siya nga uyon sa gitagana nga paagi sa Dios.

143 Mao gihapon nga butang ang atong nahibaloan mahitungod kang Elias. Gipangbadlong sa tigulang nga si Elias ang daghan kaayo niadtong mga Jezabel nga pinintalan-ang-nawong, ug ang mga alut, ug uban pa, nga aduna sila kaniadto nga adlaw, gigahin gayud sa maong tigulang nga tawo ang iyang kinabuhi sa pagpangkondena sa sala taliwala niadto nga mga kababayenan, tungod kay aduna man sila og usa ka babayeng, si Jezabel, nga mao’y nagpasiugda.

144 Halos sama ra gayud sa ginabuhat sa inyong Hollywood dinhi, nga gihimo ang tanang mga igsoong babaye nga magsundog-sundog gyud niana. Ug, buhi sa gihapon ang maong Jezabel, mahimo kamong motan-aw sa palibot ug inyong makita nga siya’y buhi gayud. Ug siya’y anaa gihapon sa dakung kagahum, usab.

145 Karon hingsayran nato, ang maong tigulang nga lalaki ingon nga usa ka propeta, gitunglo niya kana nga butang ug tanan na, og hingpit nga nagpabilin diha sa kabubut-on sa Dios. Sa diha nga ang tanang uban pa nga mga magwawali nangapukan na, nagpabilin ra gyud siya didto uban Niini.

146 Ug usa ka adlaw gikapoy na kaayo siya, mao nga, nagpadala ang Dios og usa ka carro gikan sa Langit, ug mga kabayo nga kalayo, ug gidala siya paitaas. Siya’y puno gayud sa gahum nga nagahatag og kinabuhi! Hunahunaa lang, nga tungod sa Pulong sa Dios sulod sa iyang kasingkasing, nahimo siyang puno kaayo nianang gahum nga mao’y naghatag kaniya og kinabuhi!

147 “Kung ang Espiritu sa Dios, Siya . . .” Nagatoo ko nga atong makita kana diha sa Mga Taga-Roma, 11, o, 1:11, “Kung,” nagaingon kini, “Kung ang Espiritu . . .” O, Mga Taga-Roma 8:11, diay kini, “Kung nagapuyo sa sulod kaninyo ang Espiritu nga mao’y nagbanhaw kang Jesus gikan sa mga patay, magahatag usab Kini og kinabuhi sa inyong may-kamatayong mga lawas. Kung ang Espiritu nga nagbanhaw kang Jesus gikan sa mga patay, kung—kung nagapuyo Kini sa sulod ninyo, magahatag usab Kini og kinabuhi sa inyong may-kamatayong mga lawas.”

148 Magahatag og kinabuhi niini! Unsa ba’y kahulogan sa pulong nga *maghatag-og-kinabuhi*? Ang Griyegong pulong nagakahulogan og, “aron pagabuhion human sa pagkamatay.” Alleluyah. Mao kana ang ganghaan sa pagsimba. Pagsimba diha sa Espiritu ug sa Kamatuoran, mekanika ug dinamika, nga magkauban. Nasabtan n’yo ba ang buut kong ipasabot?

149 “Kung nagapuyo sa sulod ninyo ang Espiritu nga nagbanhaw kang Jesus gikan sa mga patay, magahatag Kini og kinabuhi, magabuhi, sa inyong may-kamatayong mga lawas, tungod kay Kini mao na Mismo ang Kinabuhi.” Ug pagmosulod Kini sa inyong lawas, himoon Niining mapailalum ang inyong tibuok lawas ngadto Niini. Mapailalum sa unsa? Sa Pulong sa Dios. “Kung anaa man Kini kaninyo.”

150 Karon kung may unsa man sa sulod ninyo, nga nagaingon kaninyo, “Bueno, sa nangagi ra kana nga mga adlaw. Ug dili man tinuod ang Marcos 16, ug kanang Pentecostal nga ideya mahitungod sa bautismo sa Espiritu Santo.” Dili Espiritu sa Dios ang anaa kaninyo. Dili ko igsapayan kung unsa ka pa ka binansay og ayo, aba, dili kana mao ang Espiritu sa Dios. Moingon ka, “Bueno, ang akong inahan miyembro man sa *ingon niini*, ug ang akong amahan, ug ang akong igsoon usab, sulod na sa daghang mga katuigan.” Bisan unsa pa ma’y gusto mong isulti mahitungod sa imong mga paryente, ug uban pa, mahimong okey ra kadto kanila; apan dili na para kanim, kita n’yo, kinahanglan gyud nga makasulod ka kang Cristo Jesus niini nga adlaw, alang niini nga panahon ug sa saad nga gikatagana alang niini nga kapanahonan.

151 Himatikdi, hingsayran nato nga Kining dakung gahum nga nagahatag og kinabuhi miigo kang Enoch, gibuhi siya Niini ug Mipauli siya nga wala man lang namatay.

152 Miigo ’sab Kini kang Elias, gibuhi siya hangtud nga Mipauli siya nga wala man lang namatay.

153 Hingsayran pud nato nga ang iyang manununod mao si Eliseo, nga usa ka tipo kaniadto ni Cristo ug sa Iglesia, si Eliseo. Mibuhat si Elias ug upat ka milagro, ug mibuhat ’sab si Eliseo og walo ka milagro. Aduna siya’y dobleng bahin, sama sa gikabubo ngadto sa Iglesia. [Blangko nga bahin sa teyp—Ed.] Pagkahuman niadto dihay usa ka patay na nga tawo, nga gibalibag ibabaw sa mga bukog ni Eliseo, ug nabuhi ang maong tawo. Atua uban kang Eliseo sa lubnganan kadtong gahum nga nagahatag og kinabuhi. Dili mo puedeng. . .

154 Anaa na kini dinha kanunay, pag naangkon mo na kanang gahum sa Dios nga nagahatag og kinabuhi, ingon nga gihatagan na og kinabuhi uban Kaniya karon.

155 Karon hinumdumi, nga diha kang Cristo, kita’y unod sa Iyang unod, bukog sa Iyang bukog. Sa dihang gisamaran sa Dios si Cristo didto sa Kalbaryo, gisamaran Siya para kanako ug

para kaninyo. Kita'y unod sa Iyang unod, ug bukog sa Iyang bukog, lawas sa Iyang lawas, Ngalan sa Iyang Ngalan, og Iyang Pangasaw-onon. Kita n'yo, anaa na kita diha Kaniya, kita'y Iyang unod ug Iyang mga bukog.

<sup>156</sup> Ug gibanhaw na kita sa Dios, sa potensyal. Ang gahum nga nagahatag og kinabuhi ang nagbanhaw kanato gikan sa pagkinabuhi sa sala, ug giusab ang atong pagkatawo, sa potensyal gibanhaw na kita diha kang Cristo Jesus, ingon nga, ang pagkabhaw ang magadala kanato ngadto sa bug-os nga pagkahamtong.

<sup>157</sup> Karon hinumdumi, namatay kita sa kaugalingon natong ngalan, gilubong, ug gibanhaw diha Kaniya. Kita n'yo, dili na kita panag-iya sa atong kaugalingon. Nga, kanang halangdong Ngalan ni "Jesus Cristo" nga giingon sa Biblia dinhi sa Mga Taga-Efeso 1:21, nga, "Ang parehong pamilya, sa Langit ug yuta, gipangalan niana nga Ngalan." Dinha kon diin gipahimutang sa Dios ang Iyang Ngalan. Mao kana ang Ngalan sa maong pamilya sa Langit. Mao kana ang Ngalan sa pamilya sa yuta.

<sup>158</sup> Ug anaa na kita kang Jesus Cristo, pinaagi sa espirituhanon nga bautismo, dili pinaagi sa tubig; pinaagi sa Espiritu, gibautismohan kita pasulod ngadto sa usa ka Lawas, nga mao si Cristo, ang dapit nga pagasimbahan. Dayon, ingon nga anaa na dinha, ingon nga anaa kita ibabaw niini nga yuta, sama ra usab kini sa titulong abstract.

<sup>159</sup> Moingon ka, "Nakapalit ako og yuta." Dili pa gyud kana imoha hangtud nga aduna ka na'y titulo. Apan kung aduna ka na'y titulo, nagapakita kana nga ang tanan nga mahimong may pag-angkon niana nga bahin sa yuta imbalido na.

<sup>160</sup> Ug dayon pag nahimo ka nang usa ka Cristohanon ug gidawat na si Cristo ingon nga imong Manluluwas, nan, sa dihang ipadala sa Dios ang maong titulo, nagapakita kini nga bisan unsa pa'y nabuhat sa imong amahan, unsa pa'y nabuhat sa imong inahan, og bisan unsa ma'y nabuhat ni kinsa pa man; ang imong inahan, og amahan tingali'g mga palahubog, mga bigaon; unsa man kana, ang matag sala imbalido na! Aduna na man ka'y titulong abstract. Wala na gayu'y bisan unsa nga makapatangtang kanimo diha niini. Ug, matikdi, ang tanan tanan nga anaa niana nga yuta panag-iya na nimo! Amen. Ug sa diha nga anaa ka na usab kang Cristo Jesus, pinaagi sa bautismo sa Espiritu Santo, ang matag gasa sa Dios panag-iya na sa Iglesia. Amen. Usa kana ka kasubayang titulo. Imo, imoha na kana, panag-iya mo na kana. Magahatag kini og kinabuhi sa inyong may-kamatayon nga mga lawas. Oh, grabe, maamgo gyud unta nato kini!

<sup>161</sup> Atong tan-awon kadtong mga maunongon sa Pentecostes kaniadto. Atua silang tanan didto sa hataas nga lawak, ug nangahadlok silang tanan. Aduna sila, aduna sila og—og titulo,

oo, apan nangahadlok man sila. “Ug sa kalit may miabot nga dahunog gikan sa Langit,” ang maong titulo gipadala ngadto kanila, “sama sa usa ka nagahaguro nga makusog nga hangin, og mipuno sa tibuok balay diin didto sila nanaglingkod.” Ug nangadasig gayud sila tungod Niadto, hangtud nga sa tanan nilang pagkatalawan sila’y. . . Nahadlok ang usa kanila, nga milimod pa gani nga siya’y dili usa ka Fariseo, o siya’y dili usa ka Saduceo. Apan sa dihang mikunsad ang Espiritu Santo ug gibautismohan siya ngadto kang Jesus Cristo, nahimo siyang unod sa Iyang unod, bukog sa Iyang bukog, Pulong sa Iyang Pulong. Usa na siya ka bag-ong linalang. Usa na siya ka bag-ong tawo. Gihatagan Niini og kinabuhi ang iyang lawas.

<sup>162</sup> Tan-awa kung unsay gibuhath Niini, og kung unsay ginabuhath Niini nganha kanimong sa diha nga misulod na Kini. Dili ka ginapagawas Niini ug moingon, “Methodist ako. Baptist ako. Oh, nasayod ko nga dili gyud ko angay’ng manigarilyo. Dili ko angay’ng magbaton *niini*. Dili ko angay’ng magsul-ob og ingon niini nga matang sa mga bisti. Dili ko angay’ng buhaton ang *ingon niini*. Dili ko angay’ng buhaton ang *ingon niana*.” Pagadasigon kaayo ka Niini hangtud nga buhaton mo gayud kana. Magahatag Kini og kinabuhi sa inyong may-kamatayon nga mga lawas.

<sup>163</sup> Matikdi, gihatagan Niini og kinabuhi ang ilang mga lawas, hangtud nga mikayab sila sa ingon ka haduol ngadto sa Langit hangtud nga gihatagan Niini og kinabuhi ang ilang lawas aron mosulti og usa ka pinulongan nga wala pa gayud nila sukad madungog kaniadto. Gihatagan Niini og kinabuhi ang ilang mga lawas, og nanagsulti sila sa bag-ong Langitnon nga pinulongan. Gibuhi sila ngadto sa Presensiya sa Dios, pinaagi sa bautismo sa Espiritu Santo. Gibautismohan sila sa gahum sa Dios nga nagahatag og kinabuhi ngadto niana. Atua na man sila sa dapit sa pagsimba kaniadto. Atua na sila didto kon diin sila mahimong magsimba. Walay Sanhedrin o bisan unsa pa man ang makababag kanila, tungod kay nangadasig gayud sila. Sila’y bag-o na nga mga tawo. Kana maoy pagkahuman na nga nabautismohan sila kaniadto.

<sup>164</sup> Matikdi usab ang gamay’ng si Esteban. Misulod siya ngadto sa gitagana nga paagi sa Dios, og nadasig pinaagi sa gahum sa Dios; misulod sa ganghaan, sa gikatagana nga paagi sa Dios. Ug bisan kaniadtong nangadto na sila aron patyon siya, gibato siya hangtud nga mamatay, miingon siya, “Nakita ko ang mga Langit nga naabli, ug si Jesus nga nagatindog sa too sa Dios.” Gahum kana nga nagahatag og kinabuhi. Gidasig siya paingon ngadto sa sabakan sa Dios.

<sup>165</sup> Atua usab si Felipe, ang usa pa nga puno sa gahum nga nagahatag og kinabuhi. Hingkaplagan nato siya didto sa Samaria, nga nagpahigayon og usa ka dakung rebaybal. Kining dakung gahum nga nagahatag og kinabuhi, human nga siya

maanaa kang Cristo, miabot siya sa punto nga adunay linibo na ka mga tawo ang nagapatalinghug kaniya. Ug giingnan siya sa Dios, “Karon bumiya ka na dinhi, Felipe, gusto Kong moadto ka ngadto nianang disyerto, sa Gaza, didto. Aduna Ko’y usa ka tawo didto, nga gusto Kong mahimamat mo.” Ug walay pagduhaduha, walay pagduhaduha man lang, puno gayud siya niadtong gahum nga nagahatag og kinabuhi. Atua man siya kang Cristo, atua siya sa gitagana nga dapit kon diin makapakigsulti ang Dios ngadto kaniya. Nakigsulti ang Dios kaniya. Wala gayu’y pagduhaduha.

<sup>166</sup> Moingon, “Bueno, nakigsulti man Siya kanako ug giingnan ko nga mamaayo gayud ako, apan, wala na ako mahibalo karon, nagkagrabe man hinoon ang akong gibati karong adlawa.” Oh, grabe! “Bueno, giingnan Niya ako nga naangkon ko na kono ang Espiritu Santo, ug usahay nagaduhaduha gihapon ko niana.”

<sup>167</sup> Nasayod gayud si Felipe sa Tingog sa Dios, tungod kay miadto man siya subay sa gitagana nga paagi sa Dios. Wala niya giduhaduhaan ang Dios, mahitungod sa, “Bueno, Dios, daghan kaayo ko og mga tawo dinhi, mao nga kinahanglan ko ’usa nga magpabilin. Kinahanglan ko ’unang makigkita sa pang-estado nga presbiterio adisir kong mabuhat kana. Kinahanglan ko pang adtoan ug istoryahon ang obispo,” wala gayu’y ingon niana. Gituman gyud niya ang Dios, og paingon mismo sa maong disyerto miadto siya!

<sup>168</sup> Nakaplagan niya ang usa ka tawo, nga eunoco, usa ka Etiopiahanon, nga itum nga tawo nga nagpaingon pud didto, nagabasa sa Kasulatan sa Isaias. Ug ingon siya, “Nasabtan mo ba ang imong ginabasa?”

Miingon, “Unsaon ko man sa pagsabot kon walay tawo nga motudlo kanako?”

<sup>169</sup> Misakay si Felipe sa carro ug misugod sa pagpakig-istorya ngadto kaniya mahitungod sa Ginoo.

<sup>170</sup> Miingon ang eunoco, “Aniay tubig, unsa pa ma’y nakapugong kanako nga mabautismohan?”

<sup>171</sup> Miingon siya, “Kon ikaw nagatoo sa tibuok mong kasingkasing, sa tibuok mong kalag ug hunahuna, og kusog.” Minaug siya sa carro ug gibautismohan ang eunoco.

<sup>172</sup> Ug puno gayud si Felipe niadtong gahum nga nagahatag og kinabuhi, hangtud nga, gisakgaw Niya siya gikan sa panan-aw sa eunoco. Palandunga! Diha sa iyang may-kamatayon nga lawas, gisakgaw ang iyang pisikal nga pagkatawo, gikan sa panan-aw sa eunoco. Nagatoo ko niana nga mao ang kamatuoran. Mahimo siyang dalhon sa Dios sa kung asa pa man, kon diin Niya gikinahanglan siya. Gisakgaw siya.

<sup>173</sup> Kabalo mo, bisan ang kamatayon dili gayud makaagaw niana nga butang gikan kaninyo, sa diha nga anaa na kamo kang Cristo, sa dapit sa Dios.

174 Matikdi dinhi, aduna man usab si Moises niana. Usa siya ka propeta nga giabtan sa Pulong sa Ginoo. Dili daghan. . . bisan unsa pa ka daghan nga mga Korah ang nanungha ug miingon, “Nagkinahanglan kami og usa ka dakung organisasyon. Karon gipaninguha mo pang angkonon ang dapit ingon nga mao’y bugtong balaan nga tawo.” Miingon ang Dios, “Ipahilayo mo ang imong kaugalingon, pagalamuyon Ko siya.” Ug ang mga Dathan, ug uban pa, wala nakababag kaniya, nagpadayon mismo siya.

175 Ug sa dihang namatay si Moises ug gilubong, sa mga Manulonda, ang gahum nga nagahatag og kinabuhi anaa ra gihapon kaniya. Kay, human sa walo ka gatus ka tuig, atua na usab siya sa yutang saad, nga nagpakigsulti kang Jesus. Ang gahum nga nagahatag og kinabuhi anaa ra gihapon kaniya. Mao kana ang dapit sa Dios sa pagsimba.

176 “Unsa? Giunsa mo man pagpakahibalo?” Usa man siya ka propeta. Miabot ang Pulong sa maong propeta. Ug siya mao ang napadayag nga Pulong sa Dios alang sa iyang kapanahonan. Amen.

177 Kita n’yo, dili ka na mahimong mamatay, tungod humana ka nang gihatagan og kinabuhi. Oh, makita lang unta kana sa iglesia, nga dili nga pagahatagan pa kamo, kondili humana kamong gihatagan og kinabuhi! Ang yawa ang gapaninguhang agawon kamo gikan niana.

178 “Bueno,” moingon, “karon sultihan ko ikaw. Nahisakop man ko *niini*.” Dili ko igsapayan kung unsa ma’y imong gipasakopan.

179 Kinahanglan mong matawo, mabag-o, mabautismohan sa Espiritu Santo, pasulod kang Jesus Cristo, og dasig sa matag Pulong. Ang imong espiritu, sa sulod nimo, magapunto gyud og “amen” sa matag Pulong sa Biblia. Gawas niana, kung kana—kung pagaduhaduhan niana ang usa ka Pulong, nan hinginli kana nga espiritu. Dili man pakiglantugian sa Espiritu sa Dios ang Pulong sa Dios. Tumanon hinoon Niini ang Pulong sa Dios. Dili lang nga toohan Niini Kini, kondili buhion usab Niini Kini. Ginapadayag Niini ang Pulong sa Dios. Oo, sir.

180 Matikdi usab ang mga balaan sa Daang Tugon. Sa potensyal, ilalum sa daan nga halad, gipaabot nila kadtong bag-o nga moabot, og adunay maayong konsensiya ngadto sa Dios. Sa Mateo 27, gikasultihan kita niana, sa diha nga nabanhaw si Jesus ug migula gikan sa lubnganan. Nga, bag-ohay lang natong gisaulog pipila na ka semana ang milabay, ang Pasko sa Pagkabanhaw. Miingon ang Biblia nga, “Daghang mga balaan nga nangatulog diha sa abog sa yuta, ang namangon sa Iyang pagkabanhaw, ug nangadto sa siyudad ug nagpakita ngadto sa daghang nga tawo.” Unsa man sila? Sila mao’y mga kapadayagan sa gisaad nga Pulong sa Dios. Ang bugtong dapit diin nagapakigtambo ang Dios, ilalum mismo niana nga halad.

<sup>181</sup> Karon sa Unang Mga Taga-Tesalonica 4:16, usab, miingon ang Biblia, nga ang mga balaan sa Bag-ong Tugon managpanungha uban Kaniya pagmoabot na Siya pag-usab, silang mga gihatagan na og kinabuhi ngadto Kaniya karon. Unsaon man ninyo pagpakasulod ngadto Kaniya? Pinaagi sa espirituhanon nga bautismo, sa gahum sa Dios, sa dapit diin Siya nagapakitagbo, diha kang Jesus. Bueno si Jesus diay mao ang gitagana nga paagi sa Dios.

<sup>182</sup> Karon matikdi, sigurado gayud si Jesus kung unsa Siya kaniadto! Nasayod Siya nga Siya mao ang Anak sa Dios. Nasayod Siya nga Siya'y natawo sa ulay. Nasayod Siya nga ang matag Kasulatan napadayag Mismo diha Kaniya. Bug-os gayud Niyang nasayran kana, hangtud nga giingnan Niya kadtong mga magtutukod sa templo, niadtong adlaw, miingon Siya, "Gub-a ninyo kining templo, ug Akong patindogon kini sa ikatulo ka adlaw." Palandunga kana. "Gub-a kini, ug Akong patindogon kini sa ikatulo ka adlaw." Ngano man? Usa man kadto ka nahisulat na nga Pulong mahitungod Kaniya.

<sup>183</sup> Miingon si David, "Dili Ko pagabiyaan ang Akong Balaan didto sa sheol, dili pagabiyaan ang Iyang kalag didto sa sheol, ni motugot Ako nga ang Akong Balaan makakita og pagkadunot."

<sup>184</sup> Bueno, nasayod gyud si Jesus nga Siya mismo kana. Wala man lang og pagduhaduha sa Iyang hunahuna. Ug nasayod Siya nga, sa setenta'y-dos oras, nagakadunot na ang lawas, sulod nianang setenta'y-dos oras mabuhi Siya pag-usab, busa miingon Siya, "Gub-a ninyo kini nga templo, Akong patindogon kini pag-usab sa ikatulo ka adlaw." Ngano man? Nahisulat na ang Pulong mahitungod Kaniya. Nahisulat na Kini mahitungod Kaniya, tungod kay Siya man mao ang kapadayagan sa sinulat nga Pulong sa Dios para niadto nga adlaw.

<sup>185</sup> Bueno, aduna gayud, alleluyah, aduna gayud, igsoon, sa kon asa man, og napadayag nga Pulong sa Dios karong panahona. Ug mao gihapon kana, tungod naghisgot man Siya mahitungod niining mga adlaw ug gisulti na Niya kung unsay mahitabo sa niini nga mga adlaw. Gisultihan na Niya kita. Nasayod kita kung unsay mamahitabo. Ug ingon nga makita kini nga napadayag diha kaninyo, kung ingon-ana anaa kamo sa Iglesia sa Dios. Gawas niana, tawgon n'yo man ang inyong kaugalingon nga, "Methodist, Baptist," o unsa pa man, dili gayud kana magpulos. Aduna lamang og usa ka tagboanang dapit, kana mao'y diha kang Cristo Jesus. Oh, sa karon, oh, niining panahona buut ko nga makita unta kana sa tanan, makita kung unsaon pagpakasulod, pinaagi sa pagpabautismo. Ang Pangasaw-onon kabahin na sa iyang Bana. Ang Iglesia usab kabahin sa Pulong, ang kapadayagan.

<sup>186</sup> Karon sa unsa nga iglesia ka ba nahisakop? Anaa ka pa ba sa denominasyon? Kung mao man, nan diretsahan kong isulti

kanimo karon, nga anaa ka pa sa Laodicea. Apan kung anaa ka diha kang Cristo, usa ka na ka bag-ong linalang, ug anaa ka sa Iglesia sa buhi nga Dios, uban ang kapadayagan sa mao ra mismong mga butang nga Iyang gibuhat sa Iyang adlaw kaniadto nga mahitabo pag-usab dinhi niini nga adlaw, og ginabuhat ang mao gihapong butang nga Iyang gisulti nga buhaton. Kung ingon-ana, mao kana ang tinuod nga Iglesia. Makasulod ka ngadto Niini pinaagi sa espirituhanon nga bautismo, dili pinaagi og pagpamiyembro, dili pinaagi sa kung unsa pa man, kondili pinaagi gayud sa bautismo sa Espiritu Santo pasulod sa Iyang Lawas. Oo. Mao lang kana ang bugtong gitagana nga paagi sa Dios nga Iyang gikabilin para kanato nga buhaton, ang mabautismohan pasulod ngadto sa Iyang Lawas, pinaagi sa Iyang Espiritu.

<sup>187</sup> Miingon si Jesus, sa San Juan 14:12, “Ang nagatoo, samtang anaa siya Kanako!” Dili ikatingala nga ginaingon sa mga tawo nga milabay na kono ang mga adlaw sa mga milagro, dili ikatingala nga ginasulti nila kining mga butanga. “Ang nagatoo nga anaa Kanako, dili nga ang nagatoo Kanako kondili ang nagatoo nga anaa Kanako, ang mga buhat nga Akong ginabuhat pagabuhaton usab niya.” Ngano man? Iya na man kining Kinabuhi. Iya kining dinamika diha sa Iyang mekanika, nga anaa kanimo, ang nagapaandar niini, nagapadagan niini ug ginabuhat ang mga buhat nga gisaad Niini nga buhaton. O, ang akong kinabuhi diha Kaniya, mao ang nagpadasig kanako pinaagi sa Iyang Espiritu, aron buhaton ang Iyang Pulong, nga mao ang mekanika, nga nagapamuhat pinaagi sa Iyang dinamika. Mga Hebreohanon 13:8, “Si Jesus Cristo mao sa gihapon kagahapon, karon, ug hangtud sa kahangturan.”

<sup>188</sup> Karon diha usab sa Marcos sa ika-17 nga kapitulo, sa ika-30 nga bersekulo, sa San Marcos. Paminaw, og ayo. Gisaad ni Jesus kining mga butanga sa kaulahiing mga adlaw, nga Siya “mao sa gihapon kagahapon ug hangtud sa kahangturan.” Gisaad Niya, sa Malaquias 4, nga Iyang “ipasig-uli ang mga kasingkasing sa mga tawo, sa kaulahiing mga adlaw, balik ngadto sa Pagtoo sa mga amahan.” Gisaad Niya kana. Gisaad Niya, sa daghan kaayo nga mga bahin sa Biblia, ang mga butang nga Iyang pagabuhaton. “Sa diriyut lamang panahon ug unya ang kalibutan dili na makakita Kanako, apan kamo makakita Kanako; Ako magauban kaninyo, diha kaninyo sa kanunay, bisan hangtud sa katapusan sa kalibutan.” Ug himatikdi sa San Lucas usab, 17:30, “Maingon sa nahitabo kaniadto sa mga adlaw sa Sodoma!”

<sup>189</sup> Nasayod ba mo kung unsay nahitabo sa Sodoma? Tan-awa n’yo ang California; dili lamang ang California, ang Estados Unidos; dili lamang ang Estados Unidos, kondili ang kalibutan mismo.



<sup>190</sup> Tan-awa kining pagkabuang sa mga kabatan-onan! Aba, aduna kita'y usa ka . . . Gisultihan ko na kamo niadtong miaging adlaw, nga naghimo sila og usa ka pagtuki didto sa mga eskwelahan sa Arizona kon diin ako nagapuyo, ug otsenta porsyento sa mga kabataan sa eskwelahan ang kulang-kulang og pangisip. Unsa na lang ang mahitabo sa niining mga kabataan? Dili na kita magkaaduna og usa pa ka henerasyon. Ania na kita sa katapusan. Giingon na ni Jesus nga mahitabo kini nga mga butang.

<sup>191</sup> Tan-awa n'yo na lang sa tanang mga telebisyon ug ang mga ingon-ana nga ginapasalida kining dili-tinuod nga mga butang. Moabot ang panahon, ako nang ginasulti daan, nga ang mga tawo mamahimong bug-os, gayud nga mabuang, og mamaingon niana ang kalibutan. Nagahisgot pud ang Biblia mahitungod sa makalilisang nga mga talan-awon sama sa ilang ginapakita sa mga salida sa karon, mahitungod sa pipila ka mga itlog sa mga linalang niadtong unang panahon nga nagpuyo kaniadto sa yuta sulod sa mga linibo ug minilyon ka tuig, nga napusa ug nangtungha nga . . . Usa ra kana ka gamay nga butang, kay sa kung unsa gyud ang mahitabo pag maablihan na ang impiyerno ug mogula ang yawa uban sa tanan niyang misteryoso nga mga butang, mga babaye . . . o dulon nga may balhibo nga sama sa mga kababayen-an, ug mga ngipon nga sama sa mga leon. Aba, ang kalibutan mamahimong bug-os, gayud nga mabuang. Kana wala na'y usa ka hugna na lang gikan karon.

<sup>192</sup> Oh, alang sa kahimayaan sa Dios, alang sa Pag-abot ni Ginoong Jesus, alang sa Espiritu Santo, alang sa mga nahibalo, alang sa buhing Presensiya sa buhi nga Dios!

<sup>193</sup> Miingon si Jesus, dinha sa San Marcos, miingon Siya, "Nianang adlaw ang Anak sa tawo igapadayag na." Karon, timan-i, dili nga Anak sa Dios. Mianhi Siya sa tulo ka ngalan sa anak: Anak sa tawo, Anak sa Dios, og Anak ni David. Kaniadtong ania pa Siya sa yuta, miabot Siya ingon nga anak sa tawo, Siya'y usa ka propeta. Ang Anak sa tawo usa man ka propeta. Gitawag ni Jehovah Mismo ang mga propeta'ng, si Jeremias ug sila nga, "Anak sa tawo, unsay nakita mo?" Miabot si Jesus, tungod kay kinahanglan Niyang moabot sumala sa Kasulatan, ingon nga Anak sa tawo. Miingon si Moises, "Ang Ginoo nga inyong Dios magpatindog og usa ka Propeta, nga sama kanako." Ug mao nga kinahanglan usa Siya ka propeta, nga Anak sa tawo.

<sup>194</sup> Apan human sa Iyang pagkamatay, paglubong, ug pagkabanhaw, karon Siya'y Anak na sa Dios, ang supernatural, ang Espiritu Santo.

<sup>195</sup> Apan nagsaad Siya, sa dili pa moabot ang katapusang panahon, nga ang kalibutan mamahimong sama sa nahitabo kaniadto sa Sodoma, sa diha nga minaug ang usa ka Lalaki sa

pormang tawo; tulo sila, duha ka Manulonda ug ang Dios Mismo. Ang Dios kadto. Miingon ang Biblia nga Siya mismo kadto. Bueno minaug Siya ug gipadayag Niya ang Iyang Kaugalingon didto, nga nakatalikod Siya sa—sa balongbalong diin atua si Sarah, ug gisultihan Niya si Abraham kung unsay gihunahuna ni Sarah sulod sa balongbalong. Husto ba kana? Bueno, si Jesus Mismo miingon, “Sa adlaw sa diha nga ginapadayag na ang Anak sa tawo,” sa laing pagkasulti, “ang Anak sa tawo, ang ministerio ni Jesus Cristo Mismo.”

<sup>196</sup> Moagi ang iglesia sa pagpamatarung, pinaagi ni Luther; sa pagpakabalaan, pinaagi ni Wesley; pinaagi sa bautismo sa Espiritu Santo, ang mga Pentecostal; ug mopaingon mismo ngadto sa kahingpitan sa Anak sa tawo, sa diha nga ang Bana ug Asawa mamahimo nang mao ra nga mga persona. Maipadayag gayud og ayo ang Dios diha sa Iyang Pangasaw-onon, sa Iyang Iglesia, hangtud nga mamahimo silang pareho na. Usa na sila. Karon nakita ba ninyo kon asa na kita.

<sup>197</sup> Ayaw mo pagpabilin niining mga tradisyon ug mga kredo. Okey man kana sa ilang adlaw kaniadto, apan namulak na man ang bulak karon. Panahon na kini sa binhi. Husto kana.

<sup>198</sup> Gisaad ni Jesus kini nga mga butang. Karon pag makita nato nga ginahimo nang buhi sa Dios ang Iyang saad sa atong atubangan, ug makita nga anaa na kini kanato, ug ang Iyang Espiritu nagapuyo sa sulod nato; mao lang kana ang bugtong paagi sa pagsimba, ang bugtong dapit sa pagsimba, ang bugtong tinuod nga paagi nga makasimba kamo, “Tungod wala na’y pagkahinukman sa silot niadtong mga anaa na kang Cristo Jesus.” Gihimo sa Dios ang maong saad. Miingon si Jesus, “Ang mga butang nga Akong ginabuhat, pagabuhaton usab ninyo,” ug kung unsa pa’y Iyang buhaton sa kaulahiing adlaw. Pagmahitabo na kana sa niini nga kapanahonan, nga dili hayag ni adlaw man, kondili mamahimong sama ra sa—sa usa ka mangitngit nga panahon, ang gikaingon nga, “Sa panahon sa kagabhion, motungha ang Kahayag.”

<sup>199</sup> Nagasubang ang adlaw sa sidlakan ug nagasalop sa kasadpan. Ang mao ra nga adlaw nga nagasubang sa sidlakan nagasalop usab sa kasadpan, sa ingon niana usab mibiyahe ang sibilisasyon. Mibiyahe kini ibabaw sa tulo ka mga kalaparan sa tubig, tulo ka mga porma sa bautismo. Oh, oo, gikan sa Asia, paingon ngadto sa Europa; gikan sa Europa, paingon ngadto sa Englatera; ug gikan sa Englatera, paingon na pud ngadto sa Estados Unidos.

<sup>200</sup> Ug karon mibalik na kita mismo, ug ania na kita niining hapon, sa West Coast, kon diin ania dinhi nagatapun-og ang kahilabihan sa sala sa tanang mga gahum sa kangitngit. Kining mga pelikula ug mga karakter sa telebisyon, ug mga kalalaken-

an nga nagahalok sa mga kababayan-an dinha, ug nga ginadaut ang mga hunahuna sa mga batang kababayan-an.

<sup>201</sup> Nasayod ba mo nga ang si kinsa man nga lalaki nga mihalok sa usa ka babaye obligado gayud siya nga pakaslan ang maong babaye? Sa potensyal usa na kana ka pagpakighilawas. Oo, pagpakighilawas kana. Oo, sir. Unsa diay kana? Tungod kini sa pang-lalaki nga mga glandula nga anaa sa ngabil sa usa ka lalaki, ug ang pang-babaye nga mga glandula. Pag magtagbo gani ang pang-lalaki ug pang-babaye nga mga glandula, pakighilawas na kana.

<sup>202</sup> Tan-awa n'yo sa Hollywood, tan-awa ang mga batang babaye nga nagalingkod dinha sa mga parke, ug ang mga lalaki usab nga ginagakus-gakus kini nga mga babaye, ug mga ingon niana, ug nagakanta pa gyud sa mga choir. Ug kining mga Elvis Presley, ug uban pa, nga aduna kita karong panahona, kaulawan kini para sa ngalan sa Amerika, og sa kung unsay gipakig-awayan ug giulaan og dugo ug gipakamatyan sa atong unang mga amahan.

<sup>203</sup> Apan moabot ang takna nga ang matag gingharian mangagun-ob, tungod aduna ma'y usa ka Gingharian sa Dios nga natukod sulod sa kasingkasing sa tawo, pinaagi sa bautismo sa Balaang Espiritu ug sa Presensiya ni Jesus Cristo. Ug moabot si Cristo para sa Iyang Pangasaw-onon ug magatukod og usa ka Gingharian dinhi sa yuta, nga dili gayud magun-ob. Unsaon man ninyo pagpakasulod ngadto niini nga Gingharian? Natawo kamo sulod Niini. Unsaon man ninyo pagpakabalo Niini? Padayon lang mo. . . Unsaon man ninyo pagpahisakop sa usa ka gingharian ug dili-mouyon sa hari? Kita n'yo, mamahimo kamong. . . Ug ang Hari mao ang Pulong. "Sa sinugdan mao na ang Pulong, ug ang Pulong kauban sa Dios, ug ang Pulong mao ang Dios. Ug ang Pulong nahimong unod ug nagpuyo ipon kanato. Mao sa gihapon kagahapon, karon, ug hangtud sa kahangturan."

<sup>204</sup> Giunsa man nila pagkahibalo nga Siya mao ang Anak sa tawo? Motan-aw ra Siya didto sa mga mananambong ug hibaloon kung unsay ilang ginahunahuna. Nasayod kita nga tinuod kana. Siya mao sa gihapon karon. Nagatoo ba mo niana?

<sup>205</sup> Naghatag ba si Billy og mga prayer kard? Mao kana'y akong nalimtan nga ipangutana unta kaniya. Naghatag ba siya og mga prayer kard? [Nagaingon ang kongregasyon, "Oo."—Ed.] Nanghatag na diay siya og mga prayer kard. Sige.

<sup>206</sup> Sultihan ko kamo. Kung aduna kamo'y igong pagtoo, aduna pud ako'y pagtoo nga toohan nga ang Dios, Nga naghimo sa saad, makapamatuod gayud sa Iyang Kaugalingon nga Siya mao ang Dios mismo dinhi, bisan walay tawong moduol dinhi niining entablado. Nabati ko ang pagpanguna, tungod sa saad sa Pulong sa buhi nga Dios. Tan-awa n'yo dinhi, ipakita ko kaninyo ang

usa ka butang. Kining gahum nga nagahatag og kinabuhi, i-aplikar nato Kini. Ipakita ko kaninyo. Pila man ang nagatoo nga aduna kamo og ingon nianang gahum nga nagahatag og kinabuhi? [Nagaingon ang kongregasyon, “Amen.”—Ed.] Bueno, unsa kaha’y mahitabo pag-ipandong n’yo ang inyong mga kamot nganha sa mga may sakit?

<sup>207</sup> Sa dihang nadawat kaniadto sa mga tinun-an ang gahum nga nagahatag og kinabuhi, niadtong Adlaw sa Pentecostes, unsa ma’y gibuhat nila? Nanglakaw sila ug gipandongan og mga kamot ang mga may sakit, ug nangaayo sila. Miingon si Jesus, diha sa Marcos 16, “Magapadayon kini hangtud sa katapusan sa kalibutan.” Unsa kono ka dugay, hangtud ra ba sa panahon sa mga apostoles? “Lumakaw kamo sa tibuok kalibutan, iwali ang Maayong Balita sa tanang binuhat. Kini nga mga ilhanan maganunot kanila nga nagatoo; kung pagapandongan nila sa ilang mga kamot ang mga masakiton, mangaayo sila.” Mao ’sab kana ang gahum nga nagahatag og kinabuhi nga anaa kaniadto sa mga bukog ni Elias, og sa mga bukog ni Eliseo. Ug ang mao sa gihapon nga gahum nga nagahatag og kinabuhi anaa pud sa mga balaan nga nagbanhaw kanila. Kung kanang mao ra nga gahum nga nagahatag og kinabuhi ania pud kanato, pag ipandong n’yo ang inyong mga kamot nganha sa mga may sakit, mangaayo sila.

<sup>208</sup> Akong namatikdan dinhi, halos wala na ako nagapang-ila, ginapandong ko na lang ang akong mga kamot sa mga may sakit. Akong namatikdan, bueno, may mga butang nga dili na nako. . .dili ko na man gud maatiman bisan usa na lang sa tulo ka bahin sa mga tawo, sa pagpang-ila. Kung mangpandong ko, mas daghan hinoon ang akong maatiman. Ug akong nakita ang mas maayo nga resulta, pinaagi lamang sa pagpauraray sa akong kaugalingon ngadto sa mga bukton sa Dios, ug nagaingon, “Ginoong Dios, gisaad Mo kini. Imo kining saad; dili kini akoa, Imoha kini, ug gisaad Mo nga Imong buhaton kini. Ug nakita ko na Ikaw nga gibuhat kini. Ug toohan ko gayud nga Imo kining buhaton, tungod kay nabautismohan na man ko pasulod ngadto sa Imong lawas, ug ania usab ang Imong Espiritu aron ipaila nga Kamatuoran kana.” Amen. Mao kana ang dapit sa pagsimba. Dayon mosulod ka sa usa ka dapit nga, “ang tanang butang mamahimo.” Dayon mosulod pud ka sa usa ka dapit nga ang imong—nga ang imong mga tumong ug katuyoan, og imong mga kalampusan, eksakto gayud nga anaa sa kabubut-on sa Dios. Ug sa dihang igapandong mo na ang imong mga kamot dinha ug toohan kana, mahitabo gyud kana. Nagatoo ba mo niana?

<sup>209</sup> Nagatoo ko, nga sa dili pa pagatawgon ang usa ka prayer kard, o unsa pa man, mahimong isulti kanako sa Dios nga Makagagahum-sa-tanan kung unsay anaa kaninyo dinha, ug kung unsa ang angay n’yong buhaton, ug kung unsa ang dili n’yo unta angay’ng gibuhat. Ingon niana ang pagpanguna, oo,

nasayod ko nga husto kana, apan eksaktong ingon niana usab ang gusto sa Dios nga buhaton nato. Nagatoo ba kamo niana? [Nagaingon ang kongregasyon, “Amen.”—Ed.] Pila man ang motoo niana kung buhaton kana sa Dios? [“Amen!”]

<sup>210</sup> Walay ni usa ka tawo nga ania nagalingkod sa akong atubangan nga akong nailhan, nga akong madumduman, o may nakitang si kinsa man nga ako gayud nga kaila. Pila man ang nasayod, dinhi, nga kitang tanan dili managkaila, ipataas ang inyong mga kamot. Kabalo mo nga wala gyud ko’y unsa man nga nahibaloan mahitungod kaninyo, ipataas ang inyong mga kamot. Bisan asa man diha sa mananambong, nasayod gyud nga wala ko’y unsa man nga hingsayran mahitungod kaninyo. Siguro sa tibuok bilding gayud, ilabina na dinhi. Karon tingali’g ang ubang mga tawo igo lang. . . wala ako makaila kanila. Wala lang nila gipataas ang ilang mga kamot, apan ako—ako—wala gyud ko makaila kanila, bisan pa man. Sa hunahuna ko mora’g nakita ko si Richard Blair nga ania dinhi mismo. Siguro husto kana. Mahimo ko. . . Ngitngit man gud dinha. Aduna pa gyud og mga suga sa *niini* nga direksyon. Mao nga dili nako maklaro.

<sup>211</sup> Apan tan-awa dinhi, gapaningkamot kong sultihan kamo, nga, sa dihang nakasulod na kaninyo kanang gahum nga nagahatag og kinabuhi, si Jesus Cristo kana. Sa diha nga gipandong ni Jesus ang Iyang mga kamot sa mga may sakit, nangaayo gyud sila.

<sup>212</sup> Sa diha nga aduna si Jesus og gahum nga nagahatag og kinabuhi aron maghatag og kinabuhi Kaniya, ingon nga usa ka Tawo, mahimo Niyang tan-awon ug isulti ang mga hunahuna sa mga tawo, sultihan sila kung unsay ilang ginahunahuna, og kung unsay ilang nabuhat. Motalikod Siya kanila, og sultihan sila sa mao gihapong butang, “Nganong nangatarungan man mo sulod sa inyong mga kasingkasing?” Kaniadtong gihikap sa babaye ang Iyang bisti, miingon Siya, “Kinsay mihikap Kanako?” Mitan-aw Siya sa palibot ug nakita ang babaye, ug miingon, “Gibati Ko nga may gahum nga migula Kanako. Ang imong pagtoo nakapaayo kanimo.” Si Jesus Cristo kadto. Nagapamatuod kana kung asa na ang Iglesia, ug kung unsay mahimong buhaton sa tinuod nga gahum sa Dios nga nagahatag og kinabui ngadto sa tawo. Nagatoo ba kamo niana?

Iduko nato ang atong mga ulo sa makadiyut.

<sup>213</sup> Minahal nga Dios, nagkaaduna kami og pagpakig-away kang Satanas niini nga hapon, tungod niining mga mikropono, og nahibalo nga kining mga tawo tingali’g wala na masabti ang tunga niini, tungod sa paglanog sa palibot sa. . . sulod sa bilding nga ingon niana. Apan ginaampo ko, Dios, nga ipasabot sa Balaang Espiritu ang angay’ng masabtan, Ginoo, aron makita sa mga tawo nga dili kami usa ka patay nga pundok nga mga nagalaum-laum lang. Dios, buhi kami karon, gibuhi pinaagi sa

gahum sa pagkabanhaw ni Cristo. Si Jesus Cristo nagapuyo sa sulod namo. Nagatoo kami niana, Ginoo.

<sup>214</sup> Wala kami nagaangkon og himaya sa among kaugalingon. Sama didto sa Bukid sa Pagkabalhin, kon diin girepresentar ang matag usa kanamo didto; atua si Moises, ang maong namatay ug nabanhaw; atua pud si Elias, ang madasigon nga mga balaan nga pagalalinon sa kaulahiang adlaw. Oh, nakita nila kaniadto, sa dihang milingi sila, si Jesus lang ang nakita nila. Nasayod kami, Ginoo, ayaw namo nga kami ang makita sa mga tawo. Wala kami mianhi alang niana nga katuyoan. Ipahilayo lang unta!

<sup>215</sup> Apan, Ginoo, nagakalipay ang among mga kasingkasing pagmakita namo nga nahimaya si Jesus sa among taliwala; pagmakita namo nga nahimaya Siya, pagmakita namo ang Iyang Pulong, ingon nga Siya mao ang Pulong; pagmakita namo nga mahimo ra namong basahon kini dinhi sa Biblia, diin Iyang gisaad nga buhaton kini, dayon makita Siya nga nagapamuhat niini mismo dinhi kanamo, Oh Dios, nagapabati gayud kini kanamo nga magmapainubsanon, nga hingsayran namo nga ang Iyang buhing Presensiya . . .

<sup>216</sup> Wala kami nagpamiyembro sa bisan unsa o nagpakigsabot alang sa bisan unsa man. Nagatoo lamang kami, Ginoo, para sa Kinabuhing Walay Katapusan. Ug giselyohan Mo na kami dinha pinaagi sa bautismo sa Espiritu Santo, ug gihatagan og kinabuhi ang among mga lawas, ug gibuhi ang among mga espiritu, ug gibuhi kami aron makakita og mga panan-awon, ug magapropesiya, ug magasulti'g laing mga dila, makakita og dagkung mga ilhanan ug mga katingalahan nga nagakahitabo. Aba, ang buhing Dios kana. Anaa na kami niana nga Lawas. Nga, para sa kalibutan, binuang ra kini para kanila nga mangalaglag; apan para kanamo nga nagatoo, kini mao'y gahum sa Dios, ngadto sa Kinabuhing Walay Katapusan. Ginapasalamatan Ka namo tungod niini, Amahan.

<sup>217</sup> Karon tugoti nga maipahibalo niini nga adlaw, Ginoo, nga Ikaw mao ang Dios, nga wala Mo gayud ginausab kaniadto pa ang Imong hunahuna mahitungod sa usa ka Pulong nga Imong gisulti. Ug Ikaw mao sa gihapon kagahapon, karon, ug hangtud sa kahangturan, ug ang usa—ang usa ra ug bugtong Paagi nga gitagana sa Dios. Ang bugtong Tawo nga gipahimutangan sa Dios sa Iyang Ngalan, mao ang Kaugalingon Niyang Anak Nga nagdala sa Iyang Ngalan, Jesus; Dios, Jehovah, Manluwas, Emmanuel, ang Pultahan ngadto sa toril sa mga karnero; Siya nga mao sa Kaniadto, Sa Karon, ug Ang Umalabot; ang Gamut ug ang Kaliwat, ang parehong Gamut ug ang Kaliwat ni David; ang Bitoon sa Kabuntagon, ang Lirio sa Kawalogan. Oh Dios, pagka-kahibulongan! Dili ikatingala nga miingon si Isaias, “Magtatambag, Principe sa Pakigdait, Ang Dios nga makagagahum, walay katapusan nga Amahan.” Oh, wala kami laing Amahan kondili Ikaw ra, Ginoo. Ikaw ang among Amahan.

Ikaw ang among Inahan. Ikaw ang tanan-tanan kung unsa kami, ang tanan-tanan nga mamahimong unsa kami. Wala kami og unsa pa man nga makita kondili si Jesus ra nga mahimaya!

<sup>218</sup> Amahan, tingali'g ordinaryo ra gayud ang akong nabuhat, niining hapon, apan dawata ang mga pagbati sa akong kasingkasing, ug dungga ako, minahal nga Dios. Ug tugoti nga maisulti, niini nga adlaw, nga nahimaya si Jesus Cristo dinhi mismo niini nga templo. Itugot kini, Amahan, kay amo kining ginapangamuyo sa Iyang Ngalan, ug samtang mapainubsanon kong gipaabot kining mananambong, nga makita Ka nga mamuhat pinaagi sa Imong Espiritu. Amen.

<sup>219</sup> Karon gusto kong buhaton n'yo kining usa ka butang para kanako. Gusto kong mangutana kaninyo og usa ka seryoso nga pangutana. Gusto kong tubagon ninyo ako nga daw sa mao na kini ang kaulahiang higayon nga tubagon n'yo ang si kinsa man sa inyong kinabuhi. Nagatoo ba mo nga Kamatuoran kini? Nagatoo ba mo nga walay ni usa ka iglesia o usa ka denominasyon nga pagailhon diha sa Presensiya sa Dios? Nagatoo ba mo niana? Wala gayud ni usa. Kondili kadto lang mga natawo ngadto kang Jesus Cristo, og nagadala sa Iyang Ngalan! Husto kana.

<sup>220</sup> Ginadala mo na ang Iyang Ngalan sa diha nga natawo ka na dinha, dili pinaagi og bautismo sa tubig. Bisan pa og mahimo ka man nga mabautismohan sa Iyang Ngalan, apan dili kana nagapasabot nga dala mo na ang Iyang Ngalan. Madala mo ang Iyang Ngalan pinaagi lang og pagkahimugso, dili pinaagi og tubig. Kita n'yo, gibautismohan ka sa Ngalan ni Jesus Cristo, oo, sir, ngadto sa pagpakig-fellowship; apan gibautismohan ka sa Espiritu Santo, pasulod ngadto kang Jesus Cristo. Busa puede kang mabautismohan sa gatusan ka higayon, sa bisan unsang paagi nga gusto mo, og sa uban pa nga paagi, wala kana'y sapayan. Apan sa diha nga nabautismohan ka na sa Espiritu Santo, pasulod ngadto sa Lawas ni Cristo, nahimo ka nang usa ka anak nga lalaki o usa ka anak nga babaye sa Dios, ug, "Ang matag Pulong tinuod!" Ug, mao nga, gibuhath Niya kana alang niana nga katuyoan.

<sup>221</sup> Maingon sa akong gikasulti niadtong miaging adlaw, nga sa dihang milihok ang Dios ug gipasidlak ang adlaw sa tibuok yuta, nasayod na Siya nga ang mga punoan sa palmera ug ang tanan anaa na ilalum sa yuta. Siya . . . Kabahin na sila sa yuta niadtong panahona, mao man usab kamo.

<sup>222</sup> Ug sa dihang Iyang gibanhaw ang Anak sa Dios, niadtong buntag sa Pasko sa Pagkabanhaw, ug gipadala ang Balaang Espiritu, para kadto maghatag og kinabuhi, usab, sa kadtong mga binhi nga may Kinabuhing Walay Katapusan, nga daan na Niyang mga naila sa wala pa ang pagkatukod sa kalibutan, nga maania dinhi. Nasayod pud Siya nga kining mikropono

moandar nga ingon niini niining hapon. Nasayod na Siya nga mamahimong ingon niana ang pamatasan nga anaa kanimo. Wala Siya'y kinutoban. Dili mo mahimong handurawon kini sa imong hunahuna, kinahanglan mo lang nga dawaton kini. Apan, isulti ko kining usa ka butang, nga ania kanang mao ra nga Dios, niining hapon, diha sa Iyang katawhan.

<sup>223</sup> Kon usa ka man ka Methodist, Baptist, Pentecostal, kung unsa ka man, ayaw gayud pagsalig sa kung unsa nga organisasyon. Tungod kay, dili man sila mamahimong usa ka organisasyon. . . Naglangkob kana sa daghan kaayong nagkalinang mga doktrina. Naglangkob kana sa usa ka pun- . . . Kinahanglan usa ikaw ka indibiduwal, para sa Dios. Kinahanglan usa ikaw ka indibiduwal. Nagapakighilambigit ang Dios kanimo mismo, dili diha sa imong iglesia. Kinahanglan mong ikinabuhi ang husto nga matang sa kinabuhi diha sa inyong iglesia o sa kongregasyon kon diin kamo nagasimba, kinahanglan mo gyud ikinabuhi kanang matang sa kinabuhi nga angay mong ikinabuhi. Apan nakita n'yo, nagahimo hinoon sila og mga kredo, ug uban pa, nga dili ka gani makasulod sa ilang mga pultahan kung wala ka nagatoo niana. Busa makasulod kaha ang Dios dinha, kon ang Iyang Pulong kanunay nga ginapadayag?

<sup>224</sup> Giunsa man pagpakahibalo ni Luther mahitungod niining bautismo ug—ug pagpasig-uli sa Espiritu, sa dihang atua pa man siya niadtong kapanahonan niya kaniadto? Wala pa mitubo ang tanum nga mamaingon niana. Ni si Wesley wala pud nasayod niana. Ug wala usab nasayod ang Pentecostal kung unsay nagakahitabo sa karon nga panahon. Mao gihapon, nagatubo kini palayo kaninyo. Husto kana. Ingon na niana kini sa matag kapanahonan, ug mamaingon niana kini sa kanunay.

<sup>225</sup> Ug akong mapamatud-an, pinaagi sa Biblia, nga mao na kini ang kapanahonan sa trigo. Timan-i, human niining daku nga rebaybal. . . Wala na gayu'y usa pa ka organisasyon nga mitungha sukad kaniadto sa Pentecostes. Wala na'y magatungha. Nagapadayon kini gikan sa pagka-tipaka paingon sa pagka-trigo, ug wala na'y mosunod pa human sa maong lugas. Mao kana ang hinungdan. Kinse na ka tuig. . . Kasagaran, tulo ra ka tuig, ug aduna na pud sila'y usa ka organisasyon gikan sa bisan unsa nga rebaybal. Pangutan-a ninyo ang si kinsa man nga magsasaysay. Apan wala na gyu'y organisasyon human Niini. Ngani misulay man sila sa pagpatungha og usa ka Latter-day Rain, apan nakita n'yo man kung unsay nahitabo niini. Dili na kana mamahimo. Trigo na ang sa karon. Oo, sir. Wala na'y mga tigdala. Ang tinuod na kini nga lugas. Anaa na si Cristo sa taliwala sa Iyang mga tawo. Nagatoo ba mo niini?

<sup>226</sup> Magsugod kita gikan *dinhi*, sa ubos sa entablado. Dili na ako makapili dinha, tungod kay daghan kaayo mo. Pila man ang nagatoo kanako nga Iyang alagad? Magmaaduna mo og



pagtoo sa Dios! Pila man *dinhi* dapita ang nagatoo niana sa mao ra nga paagi, moingon, “Nagatoo ko niini sa tibuok kong kasingkasing”? Karon hinaut nga itugot kini sa Ginoong Dios nganhi kanato, nga inyong makita ang gahum nga nagahatag og kinabuhi. Usa ka butang, nga mahinungdanong ebidensiya, ang magapamatuod niini.

<sup>227</sup> Oo, mahimong adunay moingon, “Oh, *mao* na Kana, *ingon niini, ingon niana.*” Apan ipapamuhat kana.

<sup>228</sup> Karon, imposible gayud para kanako nga makahibalo sa bisan unsa mahitungod kaninyo. Nasayod kamo niana. Wala ako’y nailhan gawas sa usa ka tawo, nga akong nakita, ug mao kana si Reverend Blair nga nagalingkod dinha, nga taga-sidlakan, siguro sa Arkansas o sa kung asa man. Mao lang kana ang usa diha sa mga mananambong, nga akong nakita nga akong nailhan. Ug nasayod ang Dios nga tinuod kana. Busa siguradong usa gyud kana ka butang nga . . .

<sup>229</sup> Ug nahitabo lang nga akong nakita dinhi, kining gamay’ng babaye nga nagalingkod dinha sa tumoy, aduna ka’y problemang espirituwal nga imong ginaampo. Nagatoo ka ba nga sulbaron sa Dios kanang problemang espirituwal para kanimo, ug ayohon kana? Okey, maangkon mo kini.

<sup>230</sup> Ipondong ang imong kamot nganha sa usa pa ka babaye nga nagalingkod tupad nimo, tungod aduna man siya’y sakit sa tiyan nga iyang ginaampo, usab. Oo. Husto ba kana, igsoon? Ipataas ang imong mga kamot kung tinuod kana. Wala ako makaila kanimo, og wala pa gyud ta ka makita sukad sa akong kinabuhi. Duha ka itum nga mga babaye.

<sup>231</sup> Karon, unsa man kana? Dili ba tukma gayud kana sa kung unsay Iyang gisulti nga Iyang buhaton? Eksakto gayud.

<sup>232</sup> Ania’y usa ka babaye nga nagalingkod, nagatan-aw paingon mismo dinhi; nagalingkod, nga nagatan-aw kanako. Aduna siya’y sakit sa kasingkasing. Nagatoo ka ba nga ayohon sa Dios ang maong sakit sa kasingkasing? Nagalingkod ka dinha nga ngaampo, “Gusto ko unta nga makaduol dinha.” Husto ba kana? Iwarawara ang imong kamot nga ingon niini, kon husto kana. Giunsa ko man pagkahibalo kung unsay imong giingon sa imong pag-ampo?

Kita n’yo, magtoo lamang. Mao lang kana ang kinahanglan n’yong buhaton, ang motoo.

<sup>233</sup> Ania’y usa ka babaye nga nagalingkod mismo dinhi nga mamatay na gyud kung dili siya mamaayo. Aduna siya’y kanser. Nagatoo ka ba nga ayohon sa Dios ang maong kanser? Oo. Nagatoo ka ba niini? Ikaw, ingon nga medyo luya ka na gayud aron ipataas ang imong kamot, nagatoo ka ba nga mahimong isulti kanako sa Dios kung si kinsa ka? Ms. Gunn. Karon, kung husto kana, iwarawara ang imong kamot nga ingon *niana*, kita n’yo. Sige. Pauli na, ayohon ka na ni Jesus Cristo.

“Kung mahimo mong toohan, ang tanang butang mamahimo.”

<sup>234</sup> Nalandogan Niana kanang babaye nga nagalingkod dinha nga nagasul-ob og itum nga kalo, og nagatan-aw kanako. Aduna usab siya’y kanser. Nagatoo ka ba nga ayohon ka sa Dios? Nagatoo ka ba niana sa tibuok mong kasingkasing? Nagapakigsulti ko kang Mrs. Miller. Nagatoo ka ba niana? Wala ako makaila sa maong babaye, wala ko pa gyud siya nakita sa akong kinabuhi, ug nasayod ang Dios sa Langit nga husto kana. Amen.

“Kung mahimo mong toohan!”

<sup>235</sup> Aniyay usa ka itum nga babaye nga nagalingkod mismo dinhi dapit sa tumoy, nakaduko ang iyang ulo. Nagapamalandong siya, nagapamalandong siya mahitungod sa usa ka mahal sa kinabuhi, usa ka tawo nga iyang ginaampo. Mianhi siya, sa tinuod lang, aron iampo. . . maiampo siya. Wala dinhi ang maong lalaki, iyaha kining bana. Husto kana. Iyang. . . Wala siya dinhi. Atua ra siya sa balay n’yo. Aduna siya’y operasyon, dili ba? Husto kana. Nahasol pud siya tungod sa sakit nga sinusitis, ug uban pa. Tinuod kana, dili ba? Mamaayo na siya. Lig-on ang imong pagtoo para niana. Nagatoo ka ba nga tinuod kana? Amen.

<sup>236</sup> Dili ba ninyo makita nga si Jesus Cristo mao sa gihapon kagahapon, karon, ug hangtud sa kahangturan? Pangutan-a ninyo kanang mga tawo. Mikunsad na Kini nganha sa mga mananambong. Nagatoo ba mo nga ania Siya dinhi? Nabati n’yo ba kanang gahum nga nagahatag og kinabuhi sa sulod ninyo? Bueno, ang Dios kana nga nagaayo kaninyo, mga higala. Nagatoo ba mo niini?

<sup>237</sup> Karon mahimo n’yo ba ang usa ka butang para kanako? Bueno, pila man ang ania dinhi nga mga may sakit, ipataas n’yo ang inyong kamot. Karon hapit na mo-alas singko. Ipandong ang inyong mga kamot diha sa usa’g usa, ug ato lang. . . Ayaw na mo pagsulti ni usa ka pulong, ipandong lang ang inyong mga kamot diha sa usa—usa’g usa. Gusto ko nga aduna mo’y buhaton.

<sup>238</sup> Bueno, ang lalaki nga nagalingkod dinhi mismo sa luyo, adunay bukol sa iyang likod. Nagatoo ka ba nga tangtangan sa Dios kanang bukol gikan sa imong likod, sir? Nagatoo ka ba nga ayohon ka sa Dios? Siya’y batan-ong lalaki, nga nagatan-aw kanako, ug naghunahuna nga basin og malabyan ra siya. Ipataas ang imong kamot, sir. Husto kana. Tumoo ka sa tibuok mong kasingkasing, tangtangan gyud kana sa Dios para kanimo.

<sup>239</sup> Alleluyah! Ginahagit ko kining tanang mananambong, sa Ngalan ni Jesus Cristo! Kung mahimo n’yo, kung. . . Ang inyong konsensiya, ayaw tugoti nga mogahi na kana tungod sa dili-pagtoo, ayaw tugoti nga malibog kana. Dili ba ninyo makita ang Anak sa tawo, ang Anak sa tawo diha sa pormang Mensahe nga iya sa propeta, nga nagabalik pag-usab sa Iyang Iglesia, sa

propesiya, og ginadapayag si Jesus Cristo nga mao sa gihapon kagahapon, karon, ug hangtud sa kahangturan? Wala pa gayud kini mahitabo sa tanang kapanahonan, hangtud niini nga panahon. Kita n'yo? Mao kana ang kapanghimatuoran niana.

<sup>240</sup> Unsa ba ang Iglesia? Unsaon mo man pagpakasulod ngadto Niini? Pagnakasulod ka na dinha, ang tanan-tanan kung unsa si Jesus Cristo kaniadto, mao usab ikaw, nga mamahimong usa ka anak nga lalaki ug anak nga babaye sa Dios. Siya'y nahimong ikaw aron nga ikaw mahimong Siya.

<sup>241</sup> Ang problema niini, nahadlok kamong iaplikar kana, o kaha dili kamo nagatuman sa Iyang Pulong. Bueno, wala gyud kana'y mahatag nga unsa mang kaayohan, ug ako—dili ko igsapayan kung unsa ma'y ginahimo ninyo. Kung dili pa kamo bug-os nga nakasulod sa Pulong, dili gayud kana magpulos. Kinsa man kaninyo ang makaakusar kanako mahitungod sa usa ka butang nga Iyang gisulti ug gisaad para sa niining adlaw, nga wala mahitabo? Kung ingon-ana ayaw ipangandak ang denominasyon n'yo nganhi kanako, kay dili gyud kana magpulos.

<sup>242</sup> Alleluyah! Gibati ko na, nasayod ko nga ania Siya. Sigurado ako nga ania gyud Siya. Nasayod ako nga karon diha sa Iglesia aduna na'y igong gahum nga nagahatag og kinabuhi aron ayohon ang matag tawo nga nagalingkod dinhi. Mahimo n'yo bang toohan kini? Bueno, kung ingon-ana, mahimo n'yo ba?

<sup>243</sup> Nagatoo ba kamo sa pag-ampo alang sa mga may sakit? Nagatoo ba mo nga miingon si Jesus, “Pandongan nila og mga kamot ang mga masakiton, ug mangaayo sila”? Oo, ipandong ang inyong mga kamot diha sa usa'g usa karon. Ayaw kamo pag-ampo nga alang sa inyong kaugalingon. Pag-ampo kamo alang sa inyong katapad. Nagaampo usab sila alang kaninyo. Karon mapahilumon ug magmatinahuron gayud.

<sup>244</sup> Ginoo, ginapasalamatan ko gayud Ikaw, nga nakabarug ako sa niini nga entablado ug—ug nakawali og usa ka Pulong nga sukwhi kaayo sa mga panghunahuna sa mga tawo sa karon, hangtud nga tawgon nila Kini nga “laing-tinoohan,” tawgon nila Kini nga “espiritismo,” tawgon nila Kini nga “dautang mga espiritu,” sama sa gibuhat nila kaniadto, kadtong, “Beelzebub.” Apan ang makita Ka mismo sa taliwala niining daghang mananambong, niini nga hapon, nagapangtul-id ug nagpanghimatuod ug nagpamatuod sa ingon ka eksakto kung unsa ang gikawali, nga Kamatuoran gyud Kini.

<sup>245</sup> Dios, Imo kining mga tawo. Ngani naningkamot pa ang—ang yawa nga dauton kining mga mikropono, naningkamot siya nga libogon ang mga hunahuna sa mga tawo, og naningkamot siya nga mapugngan sila nga masabtan Kini. Apan nagatoo ko nga masabtan gyud nila Kini, bisan pa man, Ginoo. Nagapangamuyo ako para kanila nga masabtan Kini. Nagapangamuyo ako para kanila nga madawat Kini. Itugot, Ginoo, sa niining mga

magtotoo, nga aduna na'y gahum nga nagahatag og kinabuhi, nga sa dihang sila . . . kung dili na man sila mabuhi nga makita ang Imong Pag-abot, nan pagabanhawon sila nianang gahum nga nagahatag og kinabuhi sa kaulahiing mga adlaw.

<sup>246</sup> Itugot karon mismo nga kanang gahum nga nagahatag og kinabuhi himoong buhi ang ilang pagtoo, Ginoo, sa kung unsa man ang ilang ginabuhat. Usa ka magtotoo nga nagapandong og mga kamot diha sa usa usab ka magtotoo, usa ka lawas ngadto sa usa pa ka lawas, usa ka gahum ngadto sa usa pa ka gahum. Ug gahum kana sa Dios, pinaagi sa usa ka anak nga lalaki sa Dios o usa ka anak nga babaye sa Dios, og pinaagi sa Anak sa Dios. Oh Dios, hinaut nga buhian na ni Satanas kini nga mga tawo! Hinaut nga mamaayo na sila niining hapon, pinaagi sa gahum sa pagkabanhaw, og pinaagi sa gahum nga nagahatag og kinabuhi sa naila nga Presensiya, ni Jesus Cristo. Sa Ngalan ni Jesus Cristo, hinaut nga mamaingon gyud kini!

<sup>247</sup> Ang inyong mga kamot nga nakapandong nganha sa mga tawo aduna gyu'y gahum nga nagahatag og kinabuhi diha kanila, kung gibuhi na pud kamo. Nabuhi na ba kamo? Nahimo na bang tinuod si Cristo para kaninyo? Napadayag na ba ang gahum sa Dios? Anaa na ba kamo nianang Iglesia, sa gitagana nga Iglesia sa Dios? Kumusta na man mo Dinha, unsaon n'yo man pagpakahibalo nga nabuhi na mo Dinha? Ang tibuok ninyong mga hunahuna, ang tibuok n'yong pagkatawo, anaa na kang Cristo karon. Ug anaa si Cristo sa taliwala sa mga tawo, nagapamatuod sa Iyang Kaugalingon, og nagapamatuod nga ania Siya karon sa mga adlaw sa Sodoma.

<sup>248</sup> Pinaagi sa mga kamot niining mga tawo, nga ang mga kinabuhi nausab na gikan sa pagbaligya sa ilang mga lawas kaniadto, gikan sa pagka-palahubog, gikan sa pagka-bigaon diha sa dalan, ngadto sa pagka-tinuod nga mga balaan sa Dios, og mga gibuhi na. Nakapandong ang ilang mga kamot diha kaninyo. Nakasulod na sila sa Iglesia, pinaagi sa bautismo sa Espiritu Santo, og sa mao ra nga gahum nga atua sa mga bukog ni Elias kaniadto. Kanang mao ra nga gahum anaa usab sa inyong abaga, sa inyong mga kamot, sa inyong mga ulo, kanang mao ra nga gahum nga nagahatag og kinabuhi; samtang ania usab Siya karon nga nagapamatuod nga Siya'y nabuhi gikan sa mga patay, ginapakita ang Iyang Kaugalingon nga Siya'y buhi gayud, og ania karon nga ginabuhat ang mao rang mga butang nga Iyang gipangbuhat kaniadto ug nagapamatuod nga Kamatuoran Kini. Amen!

<sup>249</sup> Matoohan ba ninyo Siya karon? Matoohan ba ninyo nga kanang mga kamot nga naipandong diha kaninyo mga diosnong kamot, matoohan ba ninyo kanang Espiritu nga nagahatag og kinabuhi kanato karon, nga nagapalihok kanato nga daw sa mga buangbuang para sa kalibutan, nagatoo ba kamo nga Iyaha kanang gahum nga nagahatag og kinabuhi? Nagatoo ba mo nga

anaa na kamo sulod sa Iyang Iglesia? Nan, kung ingon-ana, ug nagatoo kamo nga kanang mga kamot nga nakapandong diha kaninyo kana'y mga kamot nga iya sa mga diosnon, nga minandoan sa Dios; nan ginamandoan ko kamo, sa Ngalan ni Jesus Cristo, nga manindog kamo ug dawaton ang inyong kaayohan, ang tanan nga mga masakiton.

Oh, Cristohanon, naamgo ba ninyo kung unsay nahitabo?

<sup>250</sup> Naamgo ba ninyo, nga dinha nianang mga kadalanan adunay minilyon ka tawo ang nagalakaw nianang mga dalana, karon, nga walay lain kondili mga kumpay ra sa atomika? Naamgo ba ninyo nga kanang mga tawo nga patay na tungod sa sala ug mga paglapas, ug mangitngit ang mga kinabuhi; diha sa mga kaiglesiahan sa tanang lugar, tungod ra sa pipila ka hamubong mga pagpanudlo o medyo ingon-ana mahitungod sa kung unsa nga matang sa pagsaulog sa usa ka butang, ug ila kanang tawgon nga relihiyon?

<sup>251</sup> Naamgo ba ninyo nga gibanhaw na kamo gikan sa kamatayon ngadto sa Kinabuhi, ug gibautismohan na pasulod ngadto sa Lawas sa buhi nga Dios nga naghatag og kinabuhi sa inyong mga lawas, kon diin adunay mga pagsulti og laing mga dila ug paghubad og mga dila, ug makita si Jesus Cristo nga napadayag sa atong taliwala? Aba, dili gayud makapabilin ang balatian sa ingon niini nga pundok. Itugyan ang inyong pagtoo nganha Kaniya, og toohi Siya! Moingon, "Ginoong Dios, nagatoo ako sa tibuok kong kasingkasing," ug mamaayo gayud kamo.


<sup>252</sup> Aduna ba'y mga makasasala dinhi nga gusto nang mosulod niana nga Lawas? Ipataas ang inyong mga kamot, ug moingon, "Wala pa gayud ko makasulod Niini, wala pa gayud ko napuno sa Espiritu Santo, apan, Igsoong Branham, ginatinguha ko gayud Kini niining hapon. Mahimo mo ba akong iampo?" Ipataas ang inyong mga kamot. Ayaw kamo pagkaulaw, anaa kamo sa Iyang Presensiya. Tan-awa lang ang mga kamot! Tan-awa lang ang mga kamot!

<sup>253</sup> Karon ang tanan nga nagatinguha sa bautismo sa Espiritu Santo, ipataas ang inyong mga kamot, bisan asa man kamo, nga nagatinguha Niini.

<sup>254</sup> Karon kamo nga nakadawat na sa Espiritu Santo, nga nagatindog haduol kanila, ipandong ang inyong balaan, og napahinungod na nga mga kamot sa ibabaw kanila. "Kung ang Balaang Espiritu, nga nagbanhaw kang Jesus gikan sa mga patay, nagapuyo sa sulod kaninyo, magahatag kini og kinabuhi sa inyong may-kamatayon nga mga lawas, gikan sa kamatayon ngadto sa Kinabuhi." Ginapailalum Niini ang tibuok lawas ngadto sa Espiritu. Karon iduko nato ang atong mga ulo, ug ang matag usa iampo n'yo ang maong mga tawo nga nagatinguha sa bautismo sa Espiritu Santo. Ug nagatoo ko nga

ang matag usa kaninyo pagapun-on gyud sa Dios, karon mismo, sa Espiritu Santo.

<sup>255</sup> Nganong nagahulat pa man ta, mga higala? Magahulat ka gayud og dugay, usa sa niini nga mga adlaw. Mao na kini ang takna. Dili na mo angay'ng maghulat pa. Ania na kamo dinhi mismo niining templo kon diin aduna pa kamo og tibuok gabii nga makapabilin ug mag-ampo.

<sup>256</sup> Minahal nga Dios, ginaampo ko nga Imong ipadala ang Espiritu Santo pag-usab, sama sa usa ka nagahaguros nga makusog nga hangin, pun-a ang tibuok bilding, human niining bug-os nga pagpa-ila dinhi, niining hapon, nga buhi Ikaw ug nagauban sa mga tawo. Sa Ngalan ni Jesus Cristo. Amen. 

*ANG DAPIT NGA GITAGANA SA DIOS SA PAGESIMBA* CEB65-0425

(God's Provided Place Of Worship)

Kining Mensahe ni Igsoong William Marrion Branham, una giwali sa Ingles niadtong Domingo sa hapon, Abril 25, 1965, para sa konbensiyon sa Full Gospel Business Men's Fellowship International didto sa Embassy Hotel sa Los Angeles, California, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2019 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)